

七

修

續

稿

七脩續稿序

草橋郎先生所著七脩類稿馳騁古今貫穿  
予史百家之言而折衷之吁可謂富矣嘉靖  
丙寅先生春秋八十猶日綜群籍參互考訂  
客有縱之使成績稿未及印摹而四方好奇  
之士購求恐後先生持以示予曰嘗辱子養  
德養身之教矣操此末技可愧也然一得之  
愚序以終教可乎予聞古之好學者忘食忘

憂而忘其身之老蓋其求之於內者專故所以成其身者大也今觀先生之書古今疑義辨析曲盡至論時事憂深言切矻々窮年誠不知老之將至也嗟呼舉平生之精力而從事於博聞立言之科亦甚難矣若以其嗜學之心研窮性命反求身心而有得焉則所論著又必有進於是者昔衛武公年逾九十猶日求箴儆以自益故淇澳之詩傳之至今先

生精神完固可進於武公之壽尚有武公之  
學哉後有論次當與淇澳之詩並傳無疑也  
善不佞敢以是附

賜進士出身亞中大夫雲南右叅政前奉  
勅提督兩省學政錢塘陳善撰

七修類稿宋天地類

杭仁和郎瑛仁寶著述

杭錢塘陳植槐校刊

遊閩古泉記

少嘗借人笑辛雜識亦錄野語二書見其彼此出入莫知孰先著之第以野語大事多於雜識而雜識卷帙又繁因止錄其野語今見雜識此旧四分之一若似道喪師江上等事皆缺之且無刻板悞悞未錄茲以原錄閩古泉一記附入七修他日得梓使人知宋末元初吾杭慈陽重陽皆韓侂胄之園而侂胄之宅正今太廟巷地而韓之園宅自南而北沿西繞於二庵觀今文內古蹟歷七可考焉文曰

丁亥余借錢翁泉至天聖觀訪褚伯秀遂同道士王磐隱  
遊宝蓮山麓平原故園山環皆秀石絕類香林冷泉等處  
石多穿透山斷絕互相附離其石有如玉色者聞匠者取  
爲環珥之類中有石缺杳而深泉消亡自內流出疑此即  
爲閻古泉也徵夢有開成元年六月南岳道士邢令開錢  
塘令錢華題名道士諸葛鑑元書鐫之石上又南石壁上  
鐫佛像及大字心經甚奇古不知何時爲火所燬佛多殘  
缺又一洞甚奇山頂一大石墜下旁一石承之如餽釘然  
又前一巨石不通路鑿一門其上橫石梁又有一枯池石  
壁間有細波紋不知何年水直至此處然則今之城市皆  
當澤在水底數十丈矣深谷爲陵非寓言也其餘磴道石

池亭館遺跡歷上皆在雖草木殘毀殆盡而山秀潤可愛  
大江橫於前正光潮上如練然其下俯視太廟及執政廨  
在焉山頂更荒奇峭必有可喜可噩者以足憊不往且聞  
近多虎往來白晝出沒不常遂不能盡討此山之勝故書  
之以諭好遊者石記乃周密公謹所撰周爲宋末元人  
閔古泉即今青衣泉也記云刻至元廿四年也云下視太  
廟執政府此宋官舍見前祀典官署考想初元上君旣  
北宋之官舍遺趾尚在耳

山水名數

山海經禹曰天下名山五千三百七十居地六萬四千五  
十六里出銅之山四百七十六出鐵之山三千六百九十

管子同管子地數篇地之東西二萬八千里南北二萬六千里其出水者八千里受水者八千里予意移流開掘古今因少更也然而大畧相去無何非此則有望詳之嘆矣故於諸書指出之

### 丹霄絳河

天之色蒼也翰林志曰紫霄有丹霄樓何也銀漢天河白色也而曰絳河何也蓋觀天者以北極爲標準仰觀而見者皆在北極之南故稱之曰丹曰紫曰絳借南之色以爲喻耳

### 吳會

吳會韻府勝覽序皆指松江因李紀開指吳吳會稽二



郡且有范石

湖辯為據是也

星石氣之母

昔聞先輩云金生水五金豈能生水乎蓋金即天星凡見天星即晴不見天星即雨是以星應金上生水也余獨謂未及夫金生水者金為氣母在天為星在地為石天垂象地賦形故石生雲而星降雨天地氣交星者氣之精石者氣之形精形合而水生焉又按天文志以星動搖而為風雨之候石津閏而為雨水之應此非金生水乃氣化之義歟五行以氣為主是以五行之序以金為首也

諸井

世有火山出西南夷水經註謂似火出地中有焰近楊升菴  
載火井於丹鉛餘論以其泉如油藝之然人家取為燈燭正德  
間方顯於蜀之嘉定犍為予考嘉定之志雖古有其名不  
如是也犍為則志所無楊以乃積陽之氣所產然則火山亦積  
陽而發之為火矣世有墨井見於四川等地近聞有墨井出  
河南彰德府南郭村井中產石墨故名之因思井乃人力秘  
成古曰鑿井是也恐墨石不能生於井中若中山經所載天  
井如處州南明山山隙間不施人力形圓如井某州天井山亦  
然如此則石墨可生於中故朱子解井為穴地出水之處孫子之  
兵法曰地陷曰天井是皆云天生之井也惜未深究彰德者

天食人以五氣五氣由鼻入鼻通天氣也地食人以五味五味由口入口通地氣也天陽有餘故鼻竅未嘗閉地陰不足故口嘗閉必因言語飲食而後開也及此者病也

諺言晴雨

諺言火日多雨蓋納音之數以火主五屬水木三金自然聲是則納音雖火日其實得一數則天一已生水土日其實得二數則地二已生火至水日其實得五數則天五已生土矣故火日多雨土日多晴水日多陰也是以水日必變由其水日實得生數又火晴久雨遇戊巳天干則變亦此義也

穿井

世俗以開井明目塞井損目累指其事而藉口於陰陽

予以泄地氣非所宜也及讀杜牧塞廢井文雖如予見而損目之說自唐為然又覩神仙感遇傳則亦神其事矣因將玉曆通政之法感遇傳之日辰錄之於橐廋穿井者不至徒為惟信術士陽山陰山之說况二書人間所少明目之事或未有焉省人力而獲吉辰未必無補於陰陽之一端玉曆云凡欲穿井處於夜氣清明時置水數盆於其地看何盆星光最大而明處必有甘泉感遇云子午之年五月戊酉十一月卯辰為吉丑未之年六月戊亥十二月辰巳寅申之年七月亥子正月巳午卯酉之年八月子丑二月午未辰戌之年九月申未三月寅丑巳亥之年十月申酉四月寅卯取其方位年月

日時即各福地云

秦漢用夏正

史記年表秦不置閏而爲後九月蓋以十月爲正朔故於  
當閏之歲率歸餘於終而爲後九月耳漢襲之不改自高  
帝至文帝皆書後九月則是秦漢皆以建亥之月爲正朔  
而自以建寅之月爲正月也若以建亥之月爲正月則前  
何爲遽接後九月哉况紀年皆自十月而起而後漸次以  
至於正月是十月非正月也明矣但太初九年始改歲自  
正月而起而後正朔曆數始合爲一耳又月令章句孟春  
以立春爲節驚蟄爲中又自危十度至壁八度謂之豕韋  
之次立春驚蟄居之則是漢以前皆以立春爲正月節驚

蟄爲中然此已太早若又以十月爲正月則時方孟冬豈  
宜立春驚蟄也哉觀此則秦漢用夏正而未嘗改月無疑  
商正周正皆與夏正同周祭酒已詳辨明情未及此

### 葵梧起歷

嘗思葵葵生於堯庭初一日生一葉十五日滿而十六  
日則落一葉起矣後月復生梧桐一枝生十二葉過閏  
年則生十三葉是天地生物已先曉人歷之所以起也

### 經緯星

陽經陰緯經之躡緯之躡橫天度以二十八宿爲經縱五星之躡爲緯  
橫緯躡而有當故曰經星緯星而動出入故曰緯星

### 晝夜百二十刻

嘗讀韓昌黎紀夢詩曰百二十刻須臾間註引董彥遠世間  
只百刻百二者以星紀言也朱文公以為未詳因憶三山林  
永叔之說羣書集成中趙督緣玉致道之論三言雖殊而理則  
同又覲管窺外編而曾奉之細分十刻并其其圖庶尤明白  
也不知當時文公何思不至此耶夫天行一週晝夜百刻配  
以十二時一時得八刻總而計之共九十六刻所餘四刻每  
刻分為六十分四刻則當二百四十分也布之於十二時間則  
一時得八刻二十分將八刻截作初正各四刻却將二十分零  
數分作初正初微刻初七刻者十分也正初刻者十分也既  
有初七刻正初刻非一時十刻乎一時十刻非百二十刻乎今  
因微刻分數繫于初正二字故不知耳其他或以子午二時

各得十刻或以子午卯酉各得九刻或以夜子時得四刻者皆非也此則十二時分刻之數矣又按漢哀帝時常用夏賀良百二十刻之說亦未見行與董言星紀亦恐非也茲以一時分圖於左又嘗見一書云古無漏刻畫有朝禺中晡夕夜有甲乙丙丁戊至梁武帝方置百刻惜今忘之

先初初刻 十分

次初一刻 六十分

初二刻 六十分

初三刻 六十分

初四刻 六十分

正初刻 十分

正一刻 六十分

正二刻 六十分

正三刻 六十分

正四刻 六十分

吳王不知天文



天官書東宮蒼龍南宮朱鳥西宮咸池北宮玄武口龍  
鳥以形而言曰蒼曰朱以方位言也咸池玄武單指方位  
之地而言因李紱聞引吳氏以咸池乃天潢南三星名咸  
池魚圓然此豈總西方七宿哉不知此咸池自是畢宿  
一星非西方日落之咸池又曰何列參白虎於昴畢之後  
尤爲可笑此不惟吳氏不知天文王伯厚亦不知矣

### 天文難知

司馬公通鑑以魏爲正統本陳壽三國志也朱子綱目以  
蜀爲正統本習鑿齒漢晉春秋也考之天文熒惑守心魏  
文殂可以魏爲正矣他日月犯心昭烈殂魏吳無事此又  
何以辨之蓋當時之月分与日辰不同故也心固步天歌

以謂應當今之帝彼時三国同時月日各有所指昔北朝  
高允与崔浩論漢五星聚東井之事則由術家之差非三  
国各方隅日月時辰有所指耳此天度幽遠难知且不可  
輕泄也

### 北斗九星

北斗七星雖在紫薇垣外垣内數也第一天樞二天旋三  
天機四天權五玉衡六開陽七瑶光并輔弼二星謂之九  
星此北斗經疏与灵臺本世行圖同但圖与臺本無弼星  
弼在垣門又非也步天歌与星說又并無之未知何指徐  
長曆云北斗下有二陰星或是此必黑者未見也又春  
初運斗以搖光為招搖非也招搖自是底宿一星楚辭補

原缺

七修類稿國事類

杭仁和郎瑛仁寶著述

杭錢塘陳植槐校刊

廟祀夫子像

漢以前樂祖經師習其道者祀其人東漢雖以聖師禮周公孔子亦未有廟也廟祀自唐始歷代加稱尊號而有像焉嘉靖中閣老張羅峯奏去其像用木牌止稱曰先師

張中

張中字景華臨川人奉進士不第遇異人每談禍福多驗常戴鍤冠故人呼爲鍤冠道人至正四年遇太祖於宿州時太祖避暑卧大槐樹下大吟曰天爲羅帳地爲毡

國事卷之  
日月星辰伴我眠夜來不敢長伸脚恐踏山河地理穿道人听知佇目大駭問其姓名遂拜曰君大貴他日驗也太祖問其姓名答曰他日謁金門今人間所傳詩名鍊冠者此也

### 文官品級階資

本朝文官品級雖具於官制不能逐一會同階資則載於梅山叢書人間所少今繪錄出以便檢閱乃一代之制也凡九等焉然品級則於各部屬所正副大使副之類及各寺院監之首領凡不入流品不在清要者俱不書入階資則併因其先朝之官御皆以書之使讀者知其源也

正一品太師 太傅 太保 宗人府宗人 左右宗正 左右宗人

從一品少師 少傅 少保 太子大師 太子太傅

太子太保

正二品太子少師 太子少傅 太子少保 六部尚

書 都察院都御史 襲封衍聖公 真人 從二品

左右布政 正三品太子賓客 六部侍郎 左右副

都御史 通政使 大理寺卿 太常寺卿 詹事府

詹事 應天順天府尹 按察使

從三品光祿寺卿 太僕寺卿 行太僕寺卿 鹽運

使 布政司左右叅政 苑馬寺卿 宣慰使

正四品左右僉都御史 大理寺少卿 左右通政

太常寺少卿 少詹事 太僕寺少卿 行太僕寺少卿

卿 鴻臚寺卿 應天府丞 宣慰司同知 按

察司副使 苑馬寺少卿 各府知府

從四品國子監祭酒 布政司左右叅議 鹽運司同

知 宣慰司副使 宣撫司宣撫

正五品翰林院學士 左右春坊大學士 尚寶寺卿

華蓋護身武英文華四殿文淵閣東閣大學士 六部

郎中應天府治中 欽天監回七監七正 左右

春坊左右庶子 通政司左右叅議 光祿寺少卿

太醫院使 大理寺左右寺丞 各府同知 王府左

右長史 按察司僉事

從五品五軍總督府經歷 左右春坊左右諭德 六

部員外郎 翰林院侍讀李士侍講李士 尚書寺少

卿 司經局洗馬 各州知州 鹽運司副使

正六品尚書司丞 六部主事 太常寺丞 欽天監

回七監七副 太僕寺丞 行太僕寺丞 京縣知縣

太醫院判 兵馬司指揮 翰林院侍讀侍講 國子

監司業 中都國子監司業 大理寺左右寺正 左

右春坊左右中允 都察院經歷 各府通判 都司

經歷 斷事 長官司長官 詹事府府丞

從六品大理寺左右寺副 左右春坊左右贊善 光祿

寺署正丞左右司直郎 翰林修撰 鴻臚寺左右寺丞

光祿寺寺丞 應天府推官 順天府推官 鹽運司



判官 布政司經歷 理問所理問 各州知州

正七品五軍都督府都事 六科都給事中 監察御

史 京縣丞 太常寺博士 典簿 通政司經歷

太理寺左右評事 都察院都事 翰林院編修 行

人司正 按察司經歷 都司都事 都司副斷事

各府推官 各縣知縣

從七品中書舍人 六科左右給事中 行人司司副

太僕寺主簿 光祿寺主簿 應天順天府經歷 翰

林院檢討 各州判官 鹽運司經歷 布政司都事

理問所副理問

正八品各衙門知事 國子監丞 通政司知事 京

縣主簿 太醫院御醫 行人司行人

從八品翰林院五經博士 各府經歷 各縣丞

按察司知事 布政司照磨 正九品 各縣主簿

國朝文資四十六階第一階特進光祿大夫上柱國是正一

品加贈資凡加贈資不實授特進光祿大夫並漢官名柱

國楚官名今並稱之第二階特進光祿大夫是正一品陞

授資第三階特進榮祿大夫是正一品初授資榮祿因元

舊資銜第四階光祿大夫柱國是從一品加贈資第五階

光祿大夫是從一品陞授資第六階榮祿大夫是從一品

初授資第七階資德大夫正治上卿是正二品加贈資第

八階資政大夫是正二品陞授資第九階資善大夫是正

三品初授資正德資政資善三銜並因元舊制惟正治上卿爲新設第十階正奉大夫正治卿是從二品加贈資十一階通奉大夫是從三品陞授資十二階中奉大夫是從二品初授資正奉通奉中奉三銜並因宋舊制惟正治卿爲新設十三階正議大夫資治尹是正三品加贈資十四階通議大夫是正三品陞授資十五階嘉議大夫是正三品初授資正議通議二銜並因隋舊嘉議則因元制惟資治尹爲新設十六階大中大夫資治少尹是從三品加贈資十七階中大夫是從三品陞授資十八階亞中大夫是從三品初授資大中大夫資銜並因唐制亞中大夫則因元舊資銜惟資治少尹爲新設十九階中議大夫贊治尹是

正四品加贈資二十階中憲大夫是正四品陞授資二十  
一階中順大夫是正四品初授資中議中憲中順資銜並  
因元舊制惟贊治尹爲新設二十二階朝請大夫贊治少  
尹是從四品加贈資二十三階朝議大夫是從四品陞授  
資二十四階朝列大夫是從四品初授資朝請朝議資銜  
並因隋舊朝列則因元舊資銜惟贊治少尹爲新設二十  
五階奉政大夫脩正庶尹是正五品加贈資二十六階奉  
政大夫是正五品陞授資二十七階奉議大夫是正五品  
初授資奉政奉議資銜並因元舊制惟脩正庶尹爲新設  
二十八階奉直大夫勳正庶尹是從五品加贈資二十九  
階奉直大夫是從五品陞授資三十階奉訓大夫是從五

品初授資奉直因宋舊資銜奉訓因元舊資銜惟協正庶  
尹爲新設三十一階承德郎是正六品陞授資因元舊制  
三十二階承直郎是正六品初授資因宋旧銜三十三階  
儒林郎是從六品陞授資因唐旧銜三十四階承務郎是  
從六品初授資因宋旧銜三十五階文林郎是正七品陞  
授資因唐舊銜三十六階承事郎是正七品初授資因隋  
舊制三十七階徵事郎是正七品初授資因隋旧銜三十  
七階徵仕郎是從七品陞授資改隋徵事之銜作徵仕郎  
也三十八階從仕郎是從七品初授資亦改隋從事之銜  
爲從仕也三十九階脩職郎是正八品陞授資四十階迪  
功郎是正八品初授資並因宋旧銜四十一階脩職佐郎

是從八品陞授資四十二階迪功佐郎是從八品初授資  
並係新設四十三階登仕郎是正九品陞授資四十四階  
將仕郎是正九品初授資並因唐旧銜四十五階登仕佐  
郎是從九品陞授資四十六階將佐仕郎是從九品初授  
資並因元舊銜

元順帝宋脉

元順帝為瀛國公之子始據余應第十六飛龍之詩為證  
袁忠徹之事實及何尚書等之跋語次第明白更見於商  
山墨談以見宋家仁厚之報也予又以我

太祖北伐元之后如大臣俱被俘戮順帝之子爰猷識理  
達臘獨能逃去又非天尚番宋一脉耶

呂珍

紹興國初為張士誠命將呂珍所據珍有古良將風後為湯和圍又乏糧降珍有保越錄聞越尚存惜未見

浙省倭寇始末畧

嘉靖廿九年秋福建林汝美

號碧川

李七

時名

許二

名越

棟越獄

下海誘引日本倭奴与沿海無籍結巢双嶼嶼海鍾橫行水

上行文於浙之寧台自稱與主借銀米於某地交割否則

引兵入界官私尽空時徽人王直

即王五峯

徐惟孝

即徐私通

番泊往來寧波有日矣是年浙省巡按楊公九澤久知其

事因林文奏浙近海係邊夷地方請設重臣

上命都御史朱公純開府於浙因調福建都指揮盧鍾浙

江都指揮梁鳳等擣其巢穴嚴禁下海直不得私遂入

賊餘黨招來九州之夷

日本所屬豐前豐後等九州島故謂九州

後聯舟海上

潛以勸人毛裂鯨鯢為子仍棲海屿叩關取海取值直

是取直生時廣賊陳四盼亦累劫擾官府莫治也直

乃用計擒殺請功領乞互市之法官司不許遂令夷賊

突入定海

縣奪舡擄掠移泊烈港

去定海十里後又結巢港籍夷以援也

亡命之徒從附日衆自是華夷成黨賊續而末為患孔

棘寇温州破黃岩

縣陷鄞衢浙東南大震

詳寧波志於是

朝設總督於浙兼制閩直調募各省材官狼土等兵隨

地勦戮賊則寇寧紹溫台杭嘉之地

浙府以及蘇松常

鎮通泰植繚或數十數百大至數千赤身跳哨遍歷川



陸少則官軍捕追延害千百餘里而後滅焉如賊常集

自賊會東徙之奔海西趙紹興渡錢出南入嚴州境轉寇

蘇州固兵極之奔海西趙紹興渡錢出南入嚴州境轉寇

於木方衆則漫散一方暮聚朝掠大肆毒螫如賊數千

十餘里上賊蹤周日亦或負險結巢如寧波山紹興村

史村嘉興定海等處變靡月而遠歷年時出擄掠官

軍反致其挫刃益以器械是猶救焚以油也故所至村

市蕩爲丘墟得志之賊滿載遁去失隊奔勞者爲我俘

斬攻破遠戮者十亦二三焉此則三十五年前事而爲

首之賊矣多出於華人如蕭山沈南山徐丁巳戊午米

賊勢愈尚強也而我兵智謀勇畧者相繼而出故賊惟

東掠而流隨地寇犯慈谿崇德諸縣固嘗爲其破矣然

皆翼日遁去惟恐王師之至也由其先諭倭主戒犯我

土納書趙公文萃奏遣使往諭生員蔣洲往說之因而納款請罪大成各島使夷商善妙等齊表至也

繼而或誘其降如把總張四維誘沈或給以毒如巡按胡

死乍浦之賊數千相機詭遇陸續殲決又或圍迫故縱捨舟濟

遁則於海洋之要駕大舟以衝之率火器以擊之十必

喪其六七矣王直計擒毛烈降徐惟學斬於廣東徐明山溺於加貝肖昆林碧山擒戮海洋陳東

葉明辛五郎皆挂屍泉示詳寧波志等海編故元惡授首事無揔領勢遂敗

摧已未庚申未毒遠流於福建至辛酉年而浙地安生

矣嗚呼十年之間總制者三人王公不久陞去李公笑不

戢被誅獨胡公隨事應變竟成功十有其三焉王加與之江涇

沈家庄湖之乍浦台之仙居寧等處詳籌海等圖然而叅將以下武戢

而戰沒者百有七人

參將都指揮紹尚允等十人把總馬呈圖等十八指揮徐价等二十

三人千戶薛綱等三十一人詳籌海圖編

美

蒞王文戡遇害鄉

官生員義士又四十有二人軍民之死軍需之費不可

勝紀也嗚呼中國全勝之時倭夷無援之賊一入吾土

支撐不暇也蓋緣太平日久民不知兵沿海備弛兵

糧兩乏是以豺狼衆猛卒然而至則地方廣遠告急者

多而疲於奔調矣智慮空虛設防者窘而難於辦事矣

主兵不充召募反強則統御者難於行法矣况賊衆勢

強沉舡破釜有必勝之志我軍脆懶臨陣畏縮有必走

之心故指揮若陳善道都指揮若周應禎游擊若宗礼

非不驍勇者而援兵無人惜徒死焉文戡若知縣王鈇

系政錢絳非不效忠也而勇弱不倫亦徒斃焉此非埋揆  
之必然而中國所以不倖也哉嗚呼此豈人事之變實乃  
天道使然彰德知數吳伯通嘗曰辛亥至庚申浙江當大  
殺戮過此尚有十年小冠視今果然也少又聞謠曰東海  
小明王溫合作戰場虎頭人受苦結末在錢塘當時不知  
何指也至是王乃王直虎頭處字之首浙惟處州召募者  
衆死者幾萬矣王直戮於錢塘事不彰亡矣乎雖然天示  
者自我民行已往者將來之戒今之謀國者盍審其所務  
云噫

杭蘇糧輕之故

嘗見諸家紀吳越王橫取厲民降宋之日賫圖籍之臣

慮其賦重害民虛言被風沉冊於河太宗令補闕王求往  
均吳越田地求以錢氏稅畝每五斗為一斗上之至今  
杭越糧稅為輕若吳郡糧賦至重於天下宣德間得郡  
守况鍾奏免九十餘萬石今尚每畝科至四斗者也聞  
太祖抄沒沈萬三秀得其租簿即照租以徵糧之故王求  
况鍾可為蘇杭萬代之陰德者

南北二嶽

周礼職方掌天下之圖以正南荊州其鎮曰衡今名南  
嶽即舜南巡至於南衡者是也今湖南衡山縣漢武元封五年  
巡南郡霍山祀天柱峯遂以南衡遠阻此地亦名衡山  
遂号為南嶽今湖南直大至隋後祀於湖廣之衡山至今

不改周禮以正北并州其鎮曰恒山今名北嶽即舜北巡

至於恒山者是也

今山西大同府渾源州

唐貞觀間真定曲陽縣恒

山忽尔飛石下縣朝廷以地絀恒山遂因建祠為北嶽

春以此為北嶽

五代瓜裂宋地又不至於大同因之以祀到今弘

治中兵書馬公文升備奏唐宋之故今京師在北南行以

祀恒山為非禮當復於渾源之恒事下禮部書倪公岳原

禱曲陽而生者因執誌必可信而神已飛於曲陽遂寢南

園漫錄辨其既可飛去亦可翮予則以為當時據舜典且

證南衡之事以折之倪亦難於措辭矣蓋神無往而不在

天子命某山之為嶽則某山之神是矣昨讀兵侍徐養奇

劄記又云已復惜予草茅未知果然否

周城隍

先母嘗云吾外祖少時親見城隍生日時有黃冠為神  
附体言於衆曰予非旧神予本省憲使周新也誕乃五  
月十七日上帝以予剛直復命司杭之土時另塑其像  
遷旧神於錢塘保安里至今名為小城隍廟故以五月  
供獻於神按周廣東南海人永樂中為御史巡按京師  
福建陞雲南浙江按察使處分大務奏對詳審廉明剛  
直鋤強伸枉常理冤魂无主數事在內名為冷面寒錢  
在外稱為神明後為權奸指揮紀綱之謗上怒其言  
峻直被害事詳通紀予意剛直為神固然矣未必其為  
吾杭土神恐流言之誣周公也昨見彭參政新作

宋云 上嘗見衣紅者立日中間為誰應曰臣周新上命以臣剛直命為城隍云然後知外祖之言不誣作傳者不知為杭之司命因識之以傳於人耳

### 國家銀米數

嘗觀王閤老震澤長語記正德以前天下所徵各項銀兩每年共計二百四十三萬兩而京師各省所用之數共二百萬兩有餘似尚多矣又記正德以來各王府官諸文武官生吏等銀米數千萬石而天下所入之糧止二千六百六十八萬石夫出止言數千萬石似一時難於打筭覲總日出多入少故王府邊軍等俱缺糧餉其乏可知矣及見嘉靖初霍元厓奏疏云洪武至今自周王一府論之祿米



增數十倍子孫日益繁矣天下文武官逐代增之較洪武間增十萬餘員矣地不改開而米入有定數此供億所以日乏右二公憂國一紀於書一見於疏計今視昔六十年餘朝廷土木之興幾次矣南北夷虜之擾幾年矣王府之增軍需之費又不知幾何矣事變日出雖有如二公之心者而亦難於爲謀矣是以借官俸鬻見爵納粟放度之無數稅門美商之悖出不知民日困而國益窮矣意以天下有可興革者惟在上者善處不私耳如銀礦可開海魚可取西北荒地可墾皆自然之財之類是也如南都產箔日出八十兩浙江西湖日用數十金皆可省之亦是之尚有可更革而未知難精當國者宜致思焉

國家戊元

南園漫錄与近峯間畧記 國朝戊元之事無一字不  
同以刊書則近峯在後人則同時也二人非竊取者未  
句似文理少碍予今補二公前之所缺後之未知并易  
其末句也 國朝洪武四年開科乃辛亥也今諸書以為  
庚戌恐當時求才之急二年連開科今惟辛亥名錄存耳  
故或係安大全或係吳伯宗又有係金鑄者至十五年  
壬戌張顥宗然四人官職未聞必所終亦不大顯甲戌張  
信侍讀丙戌林環戊戌李琪庚戌林震皆終修撰戊戌  
終礼侍甲戌孫賢終太常卿兼學士丙戌羅倫終修撰戊戌  
曾彥終太常卿兼侍讀庚戌錢福壬戌康海皆終修撰近

甲戌唐肅宗丙戌龔用卿俱終修撰戊戌茅璿終吏侍  
庚戌唐汝楫終侍講壬戌徐時行 凡戌魁無一人至  
台輔豈非其數耶然羅公道高世名聞四海亦理不  
能以勝數耳

本朝火德旺

本朝之旺不知五行何屬意 太祖生時隣家見火  
浴時紅羅浮來國初多紅巾賊塔忽變紅民謠朱衣人  
作主人公國姓又朱恐火德也昨觀双槐歲抄亦然

双槐歲抄

双槐歲抄一書南海黃知縣某作也於 本朝之事最  
多且詳修史者當取焉如 孝宗之母紀后死事曹

祥反事朶顏三衛地事河套墩臺蒙古瓦剌元帝之後  
已禦虜諸將之功次京軍邊軍馬政之始末可謂最悉而  
瑣碎者亦不能枚數

七修續藁國事類終

杭仁和郎瑛仁寶著述

校刊

近詩作

輓詩盛於唐非無交而涕也壽詩盛於宋漸施於官府亦無未同而言者近時二作不論識不識傳相徵求動成卷帙可耻也空同大復集中少之此過人矣送行古所尚也今不出於親友相知之情惟官府焉勢利也噫詩之道到此蔑矣

理論

術之精者必殺身天道不容也利之多者害必隨人怨所

致也位極則危功高不賞損益之道也惟謙約爲可免耳  
有利無害求之愈得其惟孝乎然必至於貧爲仁不富矣

### 中國

中國所以爲中國者以天文四七分野俱在華夏故曰中  
天八荒曠遠星象亦難於占視雖與之同覆不可紀也豈  
特山川草木人物之異哉

### 遇不遇

楊雄與鄭子貞嚴君平同時相處惟雄知二子之賢而不  
能隨以隱致有投閣美新之醜二程與康節最相知也不  
能傳邵先天之學此非既遇而不遇耶惟孔子聖不自聖  
特問禮於老子上上得聖言而名益傳可謂相遇之美也

莊生與孟氏同時莊之輕祿言玄是深明老子者也惜孟子不得與之言而莊僅成其已卒之徧孟子天生豪傑故能私淑子思而傳道統荀子見道之言亦常有之惜又不遇孟子爲之依歸故失之性惡而流蔽致有李斯之害也是皆當遇而不遇惜哉

荆川四得

唐荆川之順嘗言予時文得之薛方山古文得之王遵巖經義得之季彭山道義得之羅念庵此亦無常師之意欤名日起而業日大有由然也今之士有寸長悻悻自得入任途擅作威福不知道也耻哉

詩言數目

予嘗意詩惟四言五言至七言而止者亦天地自然之理  
蓋人受天之理以爲性聲發天地之靈氣天有四時五  
行七政故音有四聲五音至七音而止是先天而弗違天  
也昨承宗師馮少洲賜漢魏詩紀其序得我心之同又能推  
廣詩人高下之故因錄置稟序曰予聞詩有中聲漢魏得  
數三四言短六七言長矻矻清濁氣運自然人力弗與焉  
是故刪以前惟四漢魏人五之唐人變而七之何言乎聲  
起於四喉舌之低昂開闔先天而天弗違也五音天地之  
中數故五為中聲人情極於七故言有七何言乎聲始人  
氣之呼吸四則優游約矣象太古之音也五斯和和斯有  
節歷七言焉呼吸斯竭不可復加矣是故之變聲也詩自



沈約為律法繩局趣而靈品謝色其氣象風韻自落漢魏  
人後孔子曰興於詩故高子固也子貢悟也魯之駟要思  
也斯三者詩不足以言興而况合契於鬼神乎天之生  
材也不齊故為詩之軀裁亦各不齊是故五材猶五味也  
合而和者聖也合而闕一者賢也其分多者俊傑也其得  
一者才也故其發而為聲詩能使人甘聽忘倦如飲醇酒  
一唱而三歎能使人酸心出涕使人長相思使人起舞使  
人泠然歛衽正色而坐其味不同然又有淡如勺水玄如  
太羹如苦根澁節使人吞之不得下嚥皆才之美使然不  
齊也大匠過必物色之采為明堂太廟金聲玉振之府不  
遐愁遺此繫古人幸遇與不幸遇皆天也集今裒然多矣

六  
非已乎回斂千古夥七英賢不啻太空一跽耳

七数

天之所以為天不過二氣五行化生萬物名曰七政人之  
所以為生亦不過陰陽五常之氣行於六脉見之名曰七  
情天之道惟七而氣至六日有餘氣盈朔虛則為一候故  
天道七日来復人身之氣惟七六日而行十二經絡行兩  
經有餘故人之疾至七日而輕重判焉

善惡不嫌同科

楊素以武功顯而多文藻見詩詞於文苑英華張飛以勇  
烈名而善文字見刀斗銘於涪陵州此特一身之藝併人  
而善者也甚於蚩尤之制五兵奔斯之為篆書絲之為成

桀之為瓦始皇之於長城隋煬之於漕河又人雖不善而  
事乃萬世之利尤為大異者也此善惡不嫌同科

### 食物四要

雖曰為飲食之人則人賤之然食亦人生大計况年老者  
尤宜所謹嘗見一書云食爛則易於咀嚼熱則不失香味  
予欲益其潔則動其食與少則不致厭飫斯尽矣

### 武穆不能恢復秦檜再造南宋

先正丘文莊公潘嘗云秦檜再造南宋岳飛不能恢復元  
不當与正統許衡不當仕元時以為確論也予嘗聞之惜  
未親得其所以意元乃北虜而不當仕与正統明矣岳之  
不能成功者果權臣在內則昔人云將在外君命有所不

受况郾城之抵黃龍地不遠矣恢復而請罪未晚矣以錢穀兵甲之無所出欵則因糧於敵古人所常解民倒懸猶大旱之望雨矣岳故忍而不處棄功虧於一簣耶非也岳乃忠孝純臣觀其甘死而信何鑄之欺肯一事之妄為耶丘蓋原其情而論其時知其必難矣非以少岳池檜并造南宋此則計孝宗之時筭其犒軍之費止得十有三畝故難恢復予又拙得銅牌計寸闊一而長三文乃臨安府行用準三百文省此必南渡國窮救補通變之物交會鈔引之類夫以孝宗之時尚財用之不足高宗草創國可知矣使急於用兵徒促淪亡故南渡以來雖多良將帝常為其賊驅和議之後敵緩民養國方有久立之規是檜之心雖

私而和之事則當豈非鬼神陰有以成宋家之天下耶丘  
蓋原其事而究其理非以右檜也

### 產物各異

天地至大風土各異故產物亦不同不可以未見者即為  
異王維雪中芭蕉人遂以為失寒暑近知廣東一種美人  
蕉雪中開花又如林逋杭人不知鷓鴣不木樓作詩曰雲  
木叫鉤輶此可有乎

### 近日軍

古之置軍也防患今之置軍也為患何也太平無事民出  
穀以養軍官有產以助軍是欲籍其有警以守盜發以討  
所以衛民也衛民衛國也今海賊為害有年矣未聞軍有

一方之守。一陣之敵焉。守敵者非召募之土著。百姓則  
調選別省兵勇。故見戮於賊也。非地方男婦良民。乃遠  
近召募之衆。是徒有養軍之害。而無衛民之實。國非亦  
為其損哉。或曰。子不知國之有禁乎。軍死百一之報。尚  
不可為不得已。而姑息乃至於此。應者曰。此因主將不  
恤軍士立法之過也。今亦奏准不行矣。況軍乃當死之  
徒。既有獲生。又得其養役。亦不戢焉。是罪之。乃所以恩  
之人。輕於犯法矣。然卒律以法。又恐人情變也。為今  
之計。大閱軍兵。使較射。撲軍勝於募。則以募銀之半。加  
於軍。募勝於軍。則扣軍糧之半。以益募。如此。則軍兵不  
為利而精矣。有急。以練精者上陣。以殺賊。餘當減之也。

庶民不費於召募之資國不至於倍常之費雖為民而實為國矣

鵲鷺虎猶

鵲至七夕而頸毛脫鷺遇白露必离巢虎啖人於前半月則起於上身下半月則起於下身與猶咬鼠同也人身之垂初旬頭向上而中与末旬頭俱下遊也皆載於書而試之人矣而其所以然之理難知

耳角鼻

易林曰牛龍耳聾譌言曰牛不耳听上以角尔雅翼曰龍之耳似牛意此必亦角之謂軟故龍類牛頭似而竅亦同其性順健者分陰陽若虎猶尤切肖焉故虎猶食人鼠之

過者耳必缺如鰐猶鼻四時溫冷惟夏至一時乃溫虎鼻  
常熱惟冬至一時乃冷此由稟性陰陽之至而天地陰陽  
之極則相變耳然耳

字書經文

玉篇出而說文廢也楷草與而篆隸棄也時文崇而聖  
經不明矣世變江河自趨其下人惟樂於便利憚於求  
理義耳

繆謚

繆字有四音穆音則為謚妙音則為姓綢繆則為事情  
也紕繆則為背戾綢繆紕繆姓人知而用之穆音為謚  
漢以上人識之故關羽謚繆今人只知為背戾之義以



謚之不當也殊不思秦繆魯繆禮記大傳序以昭繆繆  
是也宋以謬醜謚秦檜故晉欲謚何曾武帝不從肯以  
繆謚閔乎規張飛謚桓可知矣

### 貧

貧者士之常孔孟不必論矣而莊周顏真卿皆常乞米  
矣使用不立言其卿無大節則何異於常士故曰貧莫  
貧於未聞道賤莫賤於不知耻以貧賤而驕人無道德  
而輕富貴妄人也

### 交

與君子交不存形迹可也與小人交不存形迹可乎然  
而事變交際安得日與君子處哉但當先知其為何如

人耳苟不先知未嘗不為小人損也朋友之交可忽也哉

人形

相家以人如某物之形為貴如班超虎頸燕頤何尚之真猿之類又有以貴顯者為物之精如杜預蛇精郭璞蠃精之類予以萬物惟人取貴反欲肖一物以為貴乎由古今術士見顯者似某物遂借古人證之以成富貴之名筆之於書即成典故若夫物之精而為人其貴者庶幾有理蓋物既成精得天地之氣已久必能投胎奪舍而為人非聰明特達者乎故皮日休相解同予意而言殊朱新仲論人形同予言而意味在聖人無此論也

三書之得

本朝哈密叛事雙溪雜記所載洪張掖郡条可謂始末  
是非最悉矣至言土地規模來歷反叛之由又當併以  
槐歲抄看也麓川之夷事則當觀南園漫錄最詳而實  
蓋作錄者乃本地張尚書志淳故事上俱有年月日修  
國史者考諸

人各有長

嘗論道學之士不克建功上業之士不能文章善矣歐  
陽公曰劉柳無稱於事業姚宋不見於文章各有所專  
也故唐虞之世名臣各任一職聖人之門高第各專一  
科人非堯舜安能每事尽善惟聖人兼之

勢利

成祖皇帝命樓璉草靖難之詔適方孝孺受刑之時唯  
唯承旨歸而噴嘆自縊宋林希草東坡謫辭成而擲筆  
嘆曰壞了平生名節夫樓非不知靖難之詔不當草與  
死甚而勢迫以受也林非不知東坡之辭不可草利心  
急而計迂宰輔也然卒死而名節壞焉豈非勢利賊過  
哉況於區區士也哉

七修續彙辦證類

杭仁和郎瑛仁寶著述

杭錢塘陳植槐校刊

東坡赤壁考

東坡遊赤壁者三今人知其二者由其有二賦也余嘗讀其跋龍井題名記云予謫黃州參寥使人示以題名時去中秋十日秋濤方漲水面十里月出房心間風露浩然所居去江無十步獨與兒子邁棹小舟至赤壁望武昌山谷喬木蒼然雲濤際天因錄以寄元豐三年八月記今古文赤壁賦註謂指赤壁者三非此之謂乎據二賦在六年此則第一遊也且二賦情景不過衍此數語畧少增其事耳

若前賦佳固佳矣入曹操事恐亦未穩晁補之因其而益  
安在之言遂悞惜赤壁爲破曹之地後人因之終上併并  
赤壁之有五尤可笑也殊不思周瑜破曹者在今武昌  
嘉魚自有壁上周瑜破曹處數字東坡之遊自在黃州一  
統志下已明白註之矣且其文曰去江無十步望武昌山  
谷又曰西望夏口可知矣况武昌正當黃州東南今以前  
人之言爲主不深思而細考錯也

孟氏生年月日子

史記不書孟子生卒而孟譜云生于周定王三十七年四  
月初二日即當今之二月二也卒於赧王二十六年正月  
十五即今之十一月十五壽八十四又云孟仲子名孫

子也四十五代孫名寧嘗見一書于嶧山道人曰公孫子  
內有仲子問一篇乃知仲子實孟子之子嘗以孝於公  
孫丑惜忘其書名也

書名沿作

梁武帝撰金海王應麟撰玉海蕭子範撰千字文隋蕭微  
作萬字文古有百家姓今

朝有千家姓此效而續之之篇尚衆也王充有刺孟宋劉  
章作刺孟孟柳子厚有非國語劉章作非國語此皆反  
而正之之意實難也况王乃辭勝理者因孟而矯之時則  
可耳柳以正理而矯淫誣之辭劉何能勝之耶惜未見其  
書先正邵二泉有日格子予嘗爲格子十數條乃邵公

一時未到之意亦死中求活可輕議耶

### 春王正月

予少疑春秋春王正月意其夏正之建寅也何稱乎王如周正之子也何謂以春言仲尼脩經百世大典故爲抵牾難明之言以起後人之疑耶因質之吾師許竹厓<sub>上</sub>成論二篇上篇斷之爲夏其書王於正月之上乃仲尼特筆其義則公羊氏所謂大一統初非遵周王建子之月之謂也蓋以周夏建朔不同而其四時亦豈可易哉但朝覲會同頒朔告祠之類以其正朔行之耳紀月之數必以寅首也否則子丑寅爲春時則天氣河溫土膏何動乎下篇以春秋一書之事反覆辨證及引汲冢周書呂氏<sub>上</sub>皆用夏



正而秦沉又云漢仍秦正亦書六年冬十月則正朔改而月數不改之說唐武照用周正改十一月爲正月十二月爲臘月夏正月爲一月亦不能以子月起數以易四時可謂痛快之甚惜書爲火焚予老病又不能細考以箸聊紀於此天地類中嘗一言秦漢用夏正矣今復贅以春王正月之義焉

### 六更鼓

舊聞宮漏有六更鼓不知何代而歸田詩話載汪水雲敘亡宋事有亂點傳籌殺六更之句豹隱紀談載楊誠齋詩曰天上歸來已六更固知宋事不知何有六更也後見蟬精雋云宋內五鼓絕柳鼓遍作謂之蝦蟆更其時禁門開

而百官入所謂六更也如方外之攢點即今之發擗耳

### 半夜鍾

夜半鍾聲到客舫唐張繼之詩李林新編作溫庭筠非也  
歐陽文忠以詩則佳而無夜半鍾聲之理王直方詩話以  
金輪寺僧譙咏月而得清光何處無句喜極而夜半撞鍾  
予意謙得句而撞鍾乃各時之事張豈無據而云即以謙  
之之事以輟耶況寒山寺金輪自非一地真可謂痴人前  
不得說夢矣及見中吳紀聞辨夜半之鍾實有第惟姑蘇  
承天寺爲然予復意其龔同蘇人而寒山原非承天似亦  
未得其旨又讀墨客揮犀云古有分夜鍾蓋半夜打也予  
讀南史丘仲孚傳每讀書以中宵鍾聲爲限則思唐時半

夜真沿流古人分夜之打故于鄴有遠鍾來夜半皇南  
冉有夜半隔山鍾非後世曉暮比也龔時承天寺尚尔也

### 夜行舡

夜行舡今因皮日休有播酒三瓶寄夜航遂不察其理稱  
爲夜航船也若是則舡字重矣止爲行有杭音之故况說  
文曰航方舟也皮詩乃寄昨夜之舡耳豈寄夜行舡耶輟  
耕錄亦託書之

### 聞百草

風倍聞百草之戲獨盛於吳故荆楚記有端午四民聞百  
草之言未知其始也昨讀刘禹錫詩曰若共吳王聞百草  
不如應是欠西施則知起于吳王与施西也

重字雙名

凡重字下者可作二畫始於石鼓文內重字皆二畫也又  
名單用而不加姓於上者始於二世詔內丞相斯御史德  
也今二畫苟簡作爲二點雖可笑尚可掩也近時名士雙  
一名者而單寫下之一字不知是名耶非耶殊不思二世詔  
內李斯則言斯矣而馮去疾又何云臣去疾耶歷代雙名  
古人皆然今李古者則是草率死法而無學識真可笑也  
又如鳳凰廊廟鸚鵡三聯字下皆可省書史中用元二者  
謂元年二年宗室中用開平二字乃

東平河間二王封回皆  
省者古有之也推之皆理

三邵平

邵平有三東陵侯其一也項羽傳中邵平廣陵人主菜齊

悼惠王傳齊相邵平不知何處人爲魏勃所給至自東海  
非東陵蓋東陵嘗爲蕭何畫策術必高矣淮陰尚在何術  
中何重東陵勃豈能給平耶且時亦不同必又一人也

### 亡命爲僧

嘗見野史云駱賓王爲僧於杭之靈隱以其有宋之問之  
詩而之問又識也黃巢爲僧以其有鍊衣著盡著僧衣之  
詩張全義識之也癸辛雜志載卽四明山雪竇禪師是也  
徐敬業爲僧於衡山野客叢書載其更名住括者是也北  
朝姚泓叢書又載其爲南岳僧年九十自言其名蜀賊李  
順已正典刑辛志亦云景佑中廣州巡檢陳文璉捕得真  
李順乃僧也意皆素養貌相似者急則詭其一名一旦臨

危得之者只欲立功不辨真僞不知真者早具文牒一時毀形去之遠而未可識也

閔雲長

桑榆漫志閔雲長聽天師召使受戒護法乃陳妖僧智觀宋佞臣王欽若附會私言至於隆神助兵諸怪誕事又為腐儒收冊疑以傳疑予以既為神將听法使矣鮮州显異有錄據矣諸所怪誕或點鬼假焉亦准必其無也但傳公謚繆壯乃為不學者所疑當讀為穆如秦繆魯繆是也予已辨於繆字下謚法壯為克乱不遂穆為執義布德此非神之行乎王泉顯聖羅貫中欲伸公寃既援作普淨之事復幙合傳灯錄中六祖以公為伽藍之說故偕家即妄以

公字顏良為普安侍者殊不知普淨公之鄉人曾相遇以禮而普安元僧江西人見佛祖通載隔絕甚遠何相干涉是因伽監為監從之神普安因人姓之同遂認為監壇門神侍者故也此特藥公之甚

### 黃烏銀

猗菴寮云漢食貨志金三品黃金為上白金為中赤金為下孟康註曰白金銀也赤金銅也故今天下以白金為銀其後又云造銀錫白金夫既造銀又造白金疑非銀也恐金之白色者殊不知孟康自是而朱新仲不知銀錫合造而為白金之故予已明前事物類矣但本草有黃銀烏銀黃以為瑞物烏以為養生者造器以煮藥俱曰辟邪之物

意其黃即金也。烏或近時藥燒之物，欬然皆無辟邪之說。疑荒唐也。後讀唐史，太宗嘗以黃銀帶賜玄齡，又白云世傳黃銀，鬼神畏之。讀孟郊集，有贈炭價重，雙烏銀詩，則知唐時實有之物。後讀演繁露，方知黃銀乃赤銅，其貴比銀特色黃耳。隋時有而流至唐，初鬼神畏者，即古云鬼神畏銅之故。烏銀予恐即今之倭銀，金色如鉛之故，然亦恐踵朱新仲之誤書，以俟博。

### 送窮

四時寶鑑曰：高陽氏之子好水漿食糜，時號貧子。正月晦日，死巷，世作糜粥破衣，是日祝於巷曰：除貧，故退之。送窮文曰：正月乙丑晦，姚合詩曰：萬戶千門看，無人不送窮。若寒食競渡之事，止此日耳。猗菴寮記以唐人正月晦下句送。



窮則又少訛矣

非大聖人言

先聖大訓一書四冊楊慈湖輯大聖人之言而成者也予嘗承方伯胡公松命註明出處訛者證之時見有非聖人之言楊亦收入柰胡公去速忽忘以請教今聊記憶數條存之於稿俟可問之於人也毀鄉校章乃子產與潁明之言又雜左傳孔子止一言之斷耳鄭伐陳子產獻捷於晉章亦惟孔斷數言而已晉平公問祁奚羊舌大夫一章五人之行全無孔子之言陳恒弑其君簡公一段雖有夫子以吾從大夫之後然皆左氏辭也不知何以收之

推余

嘗聞吳人劉大參素號博學有斷工問準指卯字公隨口以木卯為準答之坐客以指昼几曰柳字也哄然一笑吾杭先輩夏大卿僚友問以余字公戲以水傍加去字是也其友認以為真後思其欺已也遽曰少年見有大乘妙余蓮花經亦同哄然至今傳為笑柄今按海篇直音準字下註刻木入竅曰準甚為明白而字林撮要又曰在水上為余人在水下為溺似皆有證也然予考之說文韻會等書俱無二字恐乃有音無文者也雖有證或亦俗書耳

鶴食物

謂言編以鶴之食物從頂咽下恐未然也今人又以鶴食蛇以足踏蛇七寸待其尾繞鶴腿然後嚼斷蛇

段七食之予嘗親見鶴初見蛇口急啣尾跌於地者  
數十次待其將死啄而吞之鶴頸比素大一倍矣遂  
曲頭於翅而睡少焉如旧矣不知譌言何所見聞今  
人之言又如此之巧

### 西臺御史

唐謂御史在長安者為西臺以別分東都者見劇談錄  
宋都汴七謂洛陽為西京亦号西臺也本朝置都察院  
於西北方以其肅殺也亦可云西臺是三朝名同而實異

### 禴祭

礼記王制祭統皆曰春祭為禴詩亦曰禴祠丞嘗獨鄭康成  
謂禴乃夏祭之名說文亦曰夏祭爾雅則曰春祠夏禴

秋嘗冬烝朱子亦然予每以經何與諸公不合昨讀困學記聞王公但為箸其不同亦未分別明白予考通志禴為虐夏祭名故韻會亦曰夏商禮也周始謂之祠禴嘗烝鄭許二公自謂夏代之夏而郭朱二公止什周之夏祭各有所指俱未錯也後世不能深考又據朱註則以鄭許之訓為春夏之夏似與禮經不同也且禴祭顏師古註淪煮新菜以祭王輔嗣曰禴以沼沚之毛蘋蘩之菜可羞於鬼神皆言祭之薄也故易曰不如西隣之禴祭今以薄祭為夏而嘗新穀曰秋則似背於字義蓋夏乃萬物盛長之時豈宜其薄哉故韻會曰春物未成其祭尚薄說文曰嘗者味之也左傳曰始殺而嘗皆指嘗牲之義非新穀

也宜謂四時禱祠烝嘗爲長

### 孟蘭盆

七月十五孟蘭盆之說諸皆主佛經目連救母於是日以百味著盆中供佛然不知何謂孟蘭盆也及讀釋氏要覽云孟蘭猶華言解倒懸似有救母之說矣而盆字又無着落問之博識不知也後見老孝庵筆記父老云故都於中元具素饌享先織竹爲盆孟狀貯帑錢於中承之以竹迨於倒以視方隅而占冬之寒暖謂之孟蘭盆乃知風俗祀先全無佛氏之意因而考夢華錄亦云以竹斫成三脚上織燈窩謂之孟蘭盆又賣素食擦米飯享先以告報秋成但多賣日連經搬其雜劇數言反覆思之孟蘭盆實起於

風俗而目連救母之事隅符是日且佛氏盂蘭盆二字之音又与之同遂訛而為孟蘭盆也或當是此葵藍盆三字亦不可知但佛教與祀先之事日崇而風俗之事日遠且微也故不復知前起義併筆記華錄抄過亦錯但於三字難通因得其說贅之於橐

### 長夜飲

史云紂踞妲姬為長夜之飲又信陵君與客長夜之飲每有婦女終為酒病卒據此則是蕪色慾而達旦之意陸放翁謂非達旦引薛許昌宮詞云盡燭燒闌曉復迷殿惟深臺下銀泥開門欲作侵晨散已是明朝日向西此恐如古人十日飲也非長夜正義

衣鉢

衣鉢二字始自佛氏五祖傳心印於廬行者謂之傳衣鉢五代和凝應舉自以榜首期待後乃第五他書云非及知選舉見范質之文尤為驚賞即以第五處之語范曰欲君傳老夫衣鉢爾後范歷官皆與和同因而場屋間謂之傳衣鉢時有詩曰從此廬堂添故事登庸衣鉢亦相傳及後馮當世知貢舉特擢彭器資為首而彭官後不如馮有詩云當時已有傳衣鉢羞媿猶為食肉僧乃為科第云然今人動以衣鉢傳言錯矣

連山歸藏易

元儒胡庭芳作易啓蒙翼傳上中下外四篇有功於易

道大矣至辨連山歸藏為偽書證幾千言也予以連山  
不見於漢志旣有之歸藏不見於漢志晉中經隋志方  
有之其偽可知矣至於言之不經又何足辨哉

王陳論史之錯

先輩王<sup>夢</sup>陳水南皆問學有識之士然於晉史一事皆  
疑而不決可謂明於大而闇於小也符堅入寇時號百  
萬朝野震驚謝玄都督前鋒遣張玄問計於謝安<sup>上</sup>都  
無所荅乃命駕出遊遂与玄圍碁暗墅王謂圍碁之玄  
上當加之姓以為別不然則是玄者為張耶抑為謝也  
陳又謂暗墅之下記者更云常時玄棋品劣是日玄誤  
遂為敵手推此則可決圍碁之為幼度及引幼度傳吳



興太守張玄之亦以才孝顯與玄同年時人稱爲南北  
二玄然則所謂張玄者豈即玄之耶抑別一人也又東  
萊詳節序安禦堅夷然無惧色命駕出遊與玄圍碁睹  
墅至夜乃還旣而兄子玄等破堅驛書至看竟便攝至  
床上此節前言與玄圍碁後言兄子玄等破堅則圍碁  
之玄果爲張爲謝幾於難別倘前之玄果幼度則兄子  
字不宜後出也宜畧更剔嗟乎推移先後引證愈疑不  
知簪橫於前迷而不見何其暗耶夫幼度旣遣張玄則  
幼度在於軍矣安無所答而即命駕遊張必隨安而俟  
其答也遂與玄圍碁非張而誰覲遂字是可知矣何必  
加之姓耶史自明而王不明反曰不知玄爲張耶抑爲

謝也已可哂矣陳因王疑而曰賭墅之下記者當更云  
云數十言則是水南亦不知幼度不在安所又不以張  
玄亦可与安對奕觀其姪既可与叔奕盤遊賭墅張玄  
不可与安奕耶復雜張玄之七事意恐奕乃玄之也真  
可謂紛七籍七疑繆愈遠載鬼一車也夫立傳則可  
入他事以明本傳之人今因玄之一字引之以證安不  
亦又可笑哉至於詳節之言亦自明白所謂兄子之字  
既後出矣初復有謝遣張玄之問計矣又何必論其爲  
張爲謝畧宜更剔耶此惟以幼度能奕而他人不能必  
欲紐之於幼度又不大可笑哉

皴

予嘗不知畫家何謂皴法問之但曰槲石要皴耳而皴之字義漠然因求之說文皴細起皮也方悟樹石所以有皴耳昨讀陸放翁筆記以皴不知何物且引楊朴之詩數个胡皴徹骨軋一壺村酒膠牙酸又南楚新聞云櫟毡根數十皴盤中猶自有紅鱗則曰想多餅餌之屬殊不知胡皴乃牛領下之垂皮對之酸酒楊言其味之惡也羶根羊肉也起其細皮對之鯉鮮新聞言其味之美也嗚呼放翁一代詩豪不知字義故古云問李要知六書信哉

### 仙俱屍解

嘗以仙無飛昇不死之理特好異者與其徒往七指其名以欺世血肉之軀安能常存哉但谷神不死隱顯係

意久亦散去也。如呂巖在宋唐時最盛。元衰今無矣。昨聞姚御史一元葬陳搏之事。明白可證。搏亳州真源人也。幼嘗有青衣老嫗來乳之。成道後隱於華山玉泉院。後又命弟子賈德昇鑿石室於張迢谷。既成而大笑。左手支頤而死。時元祐二年七月二十九日也。今嘉靖三十二年姚巡按山西同副使張瀚參政蘇志臯謁嶽廟至希夷峽。有陳之石像焉。道士言其前後之事。復出髹骨觀之。明日姚行文於蘇。命葬髹骨。是夜蘇夢希夷曰。葬我於戴岳履河之處。後得地果然也。夢中所見儼如石像。嗚呼搏誠仙矣。死有時矣。或者以其假托以去。則骨何自而來耶。即骨復假焉。以覓利又何形之於夢耶。夢

何又與石像之相似耶此尸解明矣

嶺梅

舊人咏嶺梅南枝向暖北枝寒之句以梅比擬文文山兄弟當也今人即以大槩梅花分南北而為冷暖錯矣蓋大庾嶺上梅花南枝落北枝方開規張蓋由南入粵北近江也

南園得失

張尚書南園漫錄於國事最直字義得理紀本省事甚悉但有重出之言如刘主事解礼經辨子糾非弟永昌非金齒方遜志非過忠言若異而義則一也或久而忘之耶

擁劍

魚鬣為劍以其刺人也蓋魚游則樹鬣故何遜詩曰躍魚如擁劍孟浩然詩曰游魚擁劍來吳都賦云烏賊擁劍明矣西溪叢語以鱗之恃螯為擁劍反以何孟二詩為悞殊不知螯有一種自名擁劍今惑其名而又駕之於螯也

蓬萊仙奕圖

冷謙字啓敬号龍陽子錢塘人也善音律術數之李世有蓬萊仙奕圖謂冷至正六年端陽作送張三丰者三丰仙人永樂二年轉送淇園丘国公福併跋啓敬未歷今遺落吳下一家往見諸名人集中載事題詩獨

南濠文跋具載跋語畧言二人始末未真亦不知此圖

為偽也嘗聞

太祖命真人張宇初訪求三丰

今有真人在

賦

成祖又命尚書胡公濙

天下物色

載有手書并詩

皆不獲見嘗思丘國乃

成祖心腹功臣三丰至而敢匿不言者耶且跋中止言

冷字而無名謂冷武陵人而不知本錢塘

杭州伯溫有在

志云

錢能言元時之事詳而不知為本

朝協律即知遠而不知近有是理耶跋云觀李思訓

遂得其法幻出神品以丹青鳴於時何刘伯溫之詩与

他書皆不言之而獨言善音律術數耶就使三丰真得

冷風元末已死復生

在室雖余堂觀死時楊軼為殯

子身遠遊矣豈復

帶國永樂時送人耶且跋曰冷在至正間已百數歲若在洪武必百數十歲矣如此老尚為人臣耶就使為之可謂奇矣如太公伏生人必言之何不見於書耶此必儉人假冷之名張之跋丘國之所遺見其難得之物貨人重價一時名人不察而紀其異為之題咏也予惜未見特辯之併考二人張名君實字全一遼東義州人別号玄七又号保和容忍三丰子時人又稱張刺過天順三年又來謁 帝予見其像鬚髮堅上一髻背垂面紫大腹而顴笠者

上為錫詰之文封為通微顯化大真人冷善鼓琴居杭之吳山鍛泥為釘以供衣食中年賣藥金陵洪武元年



与王偉詹同等較正郊廟樂章後有画鶴盜金之事  
遂隱不見

不知人名

史中言其數而無名言其華而無名者如高陽才子八  
人名蒼舒隕散禱戴大臨龐降庭堅仲容叔達壺關二  
老名令狐茂言霍氏之禍者周生迎僂骨之僧名大達  
詩僧皎名畫五代贊寧高姓也

諺多古書

諺有出處予併原文載之前稿已數十事矣今讀困學  
紀聞又知其所記百二十事重於吾者止三焉則知世  
間何莫而非古人之所道歟

蘇李詩

古詩十九首之下即以蘇李接之其亦五言始于二氏之說耶夫十九首諸家各指作者不同蔡寬夫因而辨之予意既名古詩又何必擬章摘事斷為何人昭明槩以古名編之當矣但蘇李之作諸家去取命篇亦各不同此則當與辨之何也蓋二氏之作有在漢在虜不同因皆陋虜七中諸篇固多傳誦後或集中有別意者即訛之于虜不可知諸家遂多以自相別為題其訛一也自晉初摯虞文章晉別志中有李陵衆作非尽陵制之言而昭明文選因之併蘇作止合取其七篇自後唐宋諸人遂以爲人所擬多不見

錄世久不傳集亦併亡其訛二也後或雜見于他書

取其半

詩經之類

取三之一者焉

補註之類

又或一章錄半兩

章合一彼此牴牾傳之到今其訛三也不知二集之  
目班固藝文志已載而通志亦有騎都尉李陵集二  
卷非止相別非擬可知矣子美有云李陵蘇武是吾  
師東坡跋黃子思詩云蘇李之天成二公尊之至矣  
夫豈無見哉因摯虞一言而後人不傳不亦謬哉予  
因之反覆玩味得之楊升菴一篇得之私臆一篇舊  
凡十六首今共得爲一十八首但據今日諸家以爲  
二氏自相別者然亦不知當時何旨今但各以次第  
編之每章之下畧爲辨證註解筆之彙而庶常接目

可質諸人云

蘇武留別親友三首

骨肉緣枝葉結交亦相因四海皆兄弟誰為行路人  
况我連枝樹與子同一身昔為鴛鴦今為參與辰  
昔為常相近邈若胡與秦惟念當離別思情日以<sub>以</sub>新  
鹿鳴思野草可以喻嘉賓我有一尊酒欲以贈<sub>以</sub>  
遠人願子留斟酌叙此平生親

其二

結髮為夫妻恩愛兩不疑歡娛在今夕燕婉及良時  
征夫懷往路起視夜何其參辰皆已沒去<sub>上</sub>從此辭  
行役在戰場相見未有期握手一長歎淚為<sub>去</sub>生別

滋努力愛春花莫忘安樂時生當復來歸死當長相思

其三

燭上晨明月馥秋

秋漢魏詩作我非

蘭芳芬馨長

補註作良是

夜發隨風聞我堂征夫懷路遠遊子戀故鄉寒冬十二月晨起踐嚴霜俯觀江漢流仰視浮雲翔良友遠別離各在天一方山海隔中州相去悠且長嘉會并

作五臣

難遇歡樂殊未央

右詩三章子卿出使時別親友之作第一為昆弟第二為妻第三為友諸家以別友為少卿此或不獨李也若為送友尤當惜無原集可考或

疑其不當自稱良友自期其難再遇也予見陰  
鏗送別始與王詩云良守送承明枉道暫逢迎  
古人自任不似今也此或可耳舊以黃鵠一章  
雜之於此觀其句意俱在虜中者可乎予故出  
之于左云

李陵送別于卿四首

寂上君子坐奕上合衆芳溫声何穆上因風動馨香  
清言振東序良時著西庠乃命絲竹音列席無高唱  
悲意何慷慨清歌正激揚長哀發華屋四坐莫不傷

其二

紅塵蔽天地白日何冥上微陰盛殺氣淒風從此興招搖

西北指天漢東南傾嗟爾窮窮當作窵廬子獨行如履水  
短褐中無緒帶斷續以繩漚水置瓶中焉辯淄與渾  
巢父不洗耳後世有何稱

其三

携手上河梁遊子暮何之徘徊蹊路側恨上不能辭  
行人難久留各言長相思安知非日月弦望自有時  
努力崇明德皓首以為期

其四

良時不再至離別在須臾屏營衢路側執手野踟躕  
仰視浮雲馳奄忽互相踰風波一失所各在天一隅  
長當從此別且復立斯湏歎因晨風發送子以賤軀

右詩四章李陵在漢送別子卿之作蘇蓋天漢  
元年以中郎將出使先時与李同為侍中最密  
明年李為騎都尉伐胡降故始章言其在漢之  
事次狀其虜地之苦譬喻及同行者末句規祝  
之也三章即事言情併及于已正朋友相規相  
勉之道也四章直言其行意矣四首似在兩時  
之作前二篇或于宴會之時後二篇臨行之際  
此不可知矣東序西庠正在長安蔽天冥上乃  
虜之地招搖主胡之星窮當作穹遊帳也紅塵  
白日二句旧見于古文苑註言下缺今楊升菴  
總得于脩文殿御覽載之丹鉛錄中似亦予得



寂上章也夫寂上章之詞之韻諸家作為別子  
卿第二首燦上章之結然豈獨非其韻哉接過  
極無下落矣但丹鉛錄中旁字亦訛又止言李  
詩而無題意今次之而為送蘇之二章正與蘇  
別李之寒冬嚴霜同意讀者自知也蓋由諸家  
不明在漢在虜槩以二氏相別為題乖戾如此  
又疑益乃惠帝之諱犯之恐後人擬者此又不  
知古人臨文不諱之義也李周翰以為凡贈出  
使不當言其失所并長別之言曾原取之非也  
吁是以疑其擬而取之者少也夫止得數篇又  
復去之可乎况此亦古人箴規之道非言其死

也。觀下文各在天一隅。前章皓首為期可知也。長別者特言其行意。觀下文立斯湏可知也。皆不可以辞害意。林實夫以良時章為答黃鵠者。劉履以為得矣。不知答黃鵠雖是長別。又當在極後讀者反復玩之自知。

少卿贈子卿二首

爍爍三星列。拳匕月初生。寒涼應節至。蟋蟀夜悲鳴。  
晨風動喬木。枝葉日夜零。遊子暮思歸。塞耳不能聽。  
遠望正蕭條。百里無人聲。豺狼鳴後園。虎豹步前庭。  
遠處天一隅。苦困獨零丁。親人隨風散。歷匕如流星。  
三革離不結。思心獨屏營。願得萱草枝。以解飢渴情。

其二

晨風鳴共林熠燿東南飛願言所相思日暮不垂帷  
明月照高樓想見餘光輝玄鳥夜過庭髣髴能復飛  
塞裳踟躕彷徨不能歸浮雲日千里安知我心悲  
思得瓊樹枝以解長渴饑

右詩二章李在匈奴初遇子卿之作始賦其時  
而言虜地之苦以感動武心末句乃言自己思  
親之情也次即托物比事直言已欲歸而未能  
又以瓊樹以喻得武而足歡陵固來說武降知  
武之心特先槩叙其好即史之置酒設樂与武  
歡也此二章觀其結句自是一義若間寂七

章不惟非韻與事自不妥帖

蘇答李一首

童七孤主柳寄根河水泥連翻遊客千冬服涼衣  
去家千里餘一身常渴飢寒夜立清庭仰瞻天漢湄  
寒風吹我骨嚴霜切我飢憂心常慘戚晨風為我悲  
瑤光將何速行願支荷遲仰視雲間星忽若割長帷  
低頭還自怜盛年行已衰依七悲明世愴七難久懷  
右詩蘇在匈奴初与李遇之作始因其言而就  
明已志芰荷中國物也終乃願之而不得歸若  
割長帷但恐年衰而此心徒久懷也此則言和  
而緩志堅而決也

李復與蘇二首

嘉會再難遇三載為千秋臨河濯長纓念子悵悠  
遠望悲風至對酒不能酬行人懷往路何以慰我愁  
獨有盈觴酒與子結綢繆

其二

鍾子歌南音仲尼歎歸與戎馬悲邊鳴遊子戀故廬  
陽鳥歸飛雲蛟龍樂潛居人生一世間貴與願同俱  
身無四凶罪何為天一隅與其苦筋力必欲榮薄軀  
不如及清時策名於天衢鳳凰鳴高岡有翼不好飛  
安知鳳凰德貴其來見稀

右詩二章李見蘇心不從始言久而得見今則

恐難并會也濯長纓結綢繆願同仕而相好次  
則興起古人即事物以喻彼此直言人生不過  
欲遂所願即史李云人生朝露何苦如此而蘇  
云勿復再言之時之作也李蓋以已不歸者由  
其友道所願而止之也

李別蘇三首

樽酒送征人踟躕在親宴日暮浮雲滋握手淚如霰  
悠七清川水嘉魴得所薦而我在萬里結髮不相見  
袖中有短書願寄双飛燕

其二

有鳥西南飛熠々似蒼鷹朝發天北隅暮聞日南陵

欲寄一言辭託之牋綵繒因風附輕翼以遺心蘊蒸  
烏辭路悠長羽翼不能勝意欲從鳥逝駕馬不可乘

其三

陟彼南山隅送子淇水陽爾行西南遊我獨東北翔  
轅馬顧悲鳴五步一彷徨雙鳬相背飛相遠日已長  
遠望雲中路相見來圭璋萬里遙相思何益心獨傷  
隨時愛景輝頌言莫相忘

右詩三首李因蘇回而贈別者也俱狀其蘇歸  
已在別情之難為每章末句始言其不得見妻  
與親友繼言難追其同行終勉其愛時以莫忘  
也漢魏詩以首章題為以軍與諸家不同惜不

知來歷

蘇荅李一首

黃鵠一遠別千里顧徘徊胡馬失其群思心常依七  
何況雙飛龍羽翼臨當乖幸有絃歌曲可以喻中懷  
請為遊子吟吟七一何悲絲竹厲清聲聲五臣慷慨  
有餘哀長歌正激烈中心愴以推欲展清商曲念子  
未得解能五臣歸俛仰內傷心淚下不可揮願為雙黃  
鵠送子俱遠飛

右詩蘇因李少卿送別而荅之者托物比興自  
喻以雙龍也句意全在虜時諸家收為繼別妻  
与弟後似非其時也三故易之于此末二句刻



克莊曰固知陵無還理尚欲援之以歸漢忠厚之至也

李復別蘇一首

徑萬里兮度沙幕為軍將兮奮鬪奴路窮絕兮矢刃  
摧士衆滅兮名已隕老母已死雖欲報恩將安歸  
右詩蘇子卿臨行時李起舞而作者史謂泣下  
數行與武決者是也

蘇又別李一首

雙鳬俱北飛一鳬獨南翔子當留斯館我當歸故鄉  
一別如秦胡會見何詎央愴恨切中懷不覓淚沾裳  
願子長努力言笑莫相忘

右詩  
送別李者因李舞歌之情知決難行  
遂亦述其相別痛情勉其莫忘為永決也

七修類稿詩文類

杭仁和郎瑛仁寶著述

杭錢塘陳植槐校刊

廣陵散

晉書載嵇康嘗遊會稽宿華陽亭引琴而彈忽客至自稱  
古人與談音律辭致清辯索琴而彈曰此廣陵散也聲調  
絕倫遂授於康誓不傳人不言姓而去及康將刑東市顧  
日影曰昔素孝已嘗從吾學廣陵散吾每靳而今絕矣海  
內至今莫不痛惜又琴書曰嵇康廣陵散本四十一拍不  
傳於世惟康之甥素孝已能琴每從康學而不與後康靜  
夜鼓之孝已竊從外聽至亂聲小有間息康疑有人推琴

出戶果見孝已止得三十三拍後孝已會止念之意續成  
八拍共四十一拍序引在而世亦罕聞焉予少曾學琴亦  
聞其無傳也嘉靖己巳宿尚書顧東橋書室見有神奇秘  
譜三卷乃明臞仙所纂首列廣陵散共該四十四拍序其  
原出隋宮傳唐宋之御府者共有六段段各有題譜餘曲  
六十有一若世所傳類四雙清之類絕少也惜譜多難抄  
今止錄其廣陵一曲詞名則具而音譜亦畧之也曲名廣  
陵散者因時晉乘魏際王陵母丘險文欽諸葛誕繼為楊川  
都督咸有興復之謀俱為司徒所殺楊地名廣陵散言魏散  
二自廣陵始也止念名篇者由音哀傷痛息客稱古人者乃  
伶倫也皆他書所考云耳

開指一段

小序三段

俱名止息

六序五段

井里

申誠

順物

因時

下時

正聲十八段

取轉

呼幽

正身

作氣

念志

沉思

返環

徇物

衝冠

長紅

寒風

發怒

亂聲十段

峻迹

守質

歸政

警畢

終思

同志

後序八段

會止目意

辭解

氣衝

微行

悲志

嘆息

謎序文

余竊得一敗快鼠蠹之餘零落太盡唯序可讀乃謎社之  
書名曰千文虎今年七十有十又得不全謎社便覽一冊  
謎家姓氏書名字母門類所宜不宜之格諸凡備矣亦錄  
其序文繼之前序蓋前序搜獵當家故事可謂博也後序

推解隱語之義可謂精也不重復而各得其善焉足以備  
一家之典故收之於稿庶謎社君子因得以求訪焉耳然  
前文失收曼倩之致謎後書失收王連環之名

千文虎序

夫謎者隱語也蓋擬詩義而爲之周道衰微禮義廢弛故  
各國之詩人歌謠各國之風上以風化下下以風刺上不  
欲明言而托于物主文譎諷言之者無罪聞之者足以爲  
誠如閔隹正后妃之德桃夭以諭夫婦鵲鵲以諭兄弟皆  
以意逆之隱語因茲而發其端自后漢蔡中郎邕嘗夜過  
曹娥廟以手捫耶鄭淳之碑遂成八字鑄之于碑陰云黃  
絹幼婦外孫董白後楊脩解之曰兩字包一字絕妙好辭

此謎之始也後魏孝文帝會郡王飲酣覩絙妓以呈其藝  
出數語命辯之曰三山橫兩人從妓女白日行青室秦兒  
斫肉与秤同有人辨得賞金鍾越城王勰曰乃一習字也  
宋陶穀使于南唐因書十二字于官舍壁間曰西川狗百  
姓眼馬包兒御厨飯宋齊丘解之十二字包四字云獨抵  
孤館至宋延祐間東坡山谷秦少游王安石輔以隱字唱  
和者甚衆刊集四冊曰文戲集行于世金章宗好謎選蜀  
人楊圓祥為魁有百斛珠刊行元至正間浙省採朱士凱  
編集萬類分為十二門何以為類引孟子曰麒麟之於走  
獸鳳凰之於飛鳥泰山之於丘垤河海之于行潦類也猶  
選天文地理人物花木等門四般一同者故為之類也號

曰揆敘萬類四明張小山太原喬吉古汴鍾繼先錢唐王  
日華徐景祥等七諸公分類品題作詩包類凡若干卷名  
曰包羅天地惜乎兵燹之餘板集皆已淪沒無一字可存  
予友賀宗善者世居錢唐幼好讀書醫藥以自給亦能隱  
語凡有詩謎若干篇後習緒之翌日踵門袖出一集面書  
自知風月乃問予曰此四字云何予解之曰自知風月者  
即獨脚虎兒也曰何以類茲名予曰嘗聞先輩云更作三  
句以成詩惜乎獨有一句更難於謎故號曰獨脚虎從善  
曰謹鑒之予視之乃千字文也以七字包四字予曰不亦  
難乎何則千字缺一句則不可若魚鱗之狀中間難包之  
字多矣况其用心之處抽黃對白諧聲假意轉轡折白街



談市語千奇百恠應帶款曲燦然靡所不備予爲從善曰胡不鋟梓即行以補將來之吝者得不泯絕此家之風味也從善曰恐儒者之所薄予曰薄此者腐儒也東坡之才博夸宏詞無所不覽尚稽心于此何況于後人乎雖曰得罪于聖門亦不害于大義啖蛤蜊自与知味者道柳亦可以發一時之懷抱尔從善曰諾于是書此以識之

續編謎社便覽序

謎者何隱語也隱微之語乎曰否隱辟之語乎曰非也何以謂之隱語曰所包者廣所藏者深惟其廣而無窮是以深而難知也其無窮非隱微而難知非隱辟乎曰不然隱微者聖賢性理之奧隱辟者後漢纖綿之書皆非此之謂

也然則吾儒亦有隱語乎曰石鼎聯句者軒轅彌明序參  
同契者鄒訢是韓昌黎朱晦菴隱其名於也曷為廣而無  
窮深而難知也曰璽絲牛毛充棟汗牛字書之繁也道聽  
塗說井蛙釜鷄幸識之拘也字義何如漢文之習而高爽  
之殺也才識何如楊脩之敏而曹操之遲也其曰譏社何  
也如里社之社衆之會道社之社禪之机也談有社而欲  
求其窮所難窮知而難知可乎曰可曰何由而可也曰其  
詳載于便覽如事者觀之勞心若思自有以克其才引伸  
觸類自有以逞其義也然則便覽作於何人曰前人作者  
多有遺集續此編者江右梧月居士而序之者則雷封衛  
陽子也

鬼神誠格

嘉靖壬寅七月醫姪慶家偶尔西簷火起隨撲滅之明日  
移東或南續發者五日人以為五通神之為也予祭即息  
至庚申年杭城大旱河井俱竭家人往汲數里因祭井而  
明日得清泉焉誠能動神果然也併文紀異示我後人  
祭五通文

自某甲子至今某日火凡七發毀瓦燎簷隣里驚憂人皆  
曰五通神之為也予以神乃五行正氣以生為心豈有悖  
常害民反神之所為耶或者邪魅狂鬼假神之名是神之  
恥神當為民誅逐之可也人又曰鬼神無棲狂背求祀予  
今申祭於神擇日廟祀神亦体民之心從正而息邪可也

否則忠言不省必將告之城隍奏之上帝罪必有歸亦豈神之利也哉惟神監之尚嚮

祭井文

父堯斯井百四十年神乃司之有列其泉載汲載飲施及隣焉今胡告涸無本稱源敬陳薄奠再浚再塞希神普化上出清漣混上不竭顯神之權既全泉名亦表予虔神惠永賴傳之簡編

詩句用古

予嘗次顧尚書自壽之詩數首內一律頸聯有酒尊花圃閑留客清簾踈簾看弈棋後會顧曰詩惟偷意可偷句耶因指簾簾之句予方覺之對以一時忘其爲杜也過日思

東坡賞花詩曰仙花不用剪乃裁國色朝酣卯酒未  
問花上不語爲誰零落爲誰開乃用南部新書內嚴憚詩  
春光冉冉歸何處更何花前把一盃盡日間花上不語爲  
誰零落爲誰開東坡故用此二句耶固終不佳偶亦  
不爲大失

### 瀑布詩

予嘗咏瀑布有青天有日雪常落白晝無雲雨自飛之句  
客過而謂曰此又一徐疑也余因續爲一絕界破青山原  
好句裁成体用任人譏蓋以徐詩固似粗直不至如或人  
所譏也客又曰瀑布固然以徐詩而爲詩意特不犯預先  
偷句之謂哉予曰昔東坡送人守嘉州詩峨嵋山月半輪

言  
秋影入平江  
菴水沉  
謫仙此語誰解道  
請君見月時登樓  
然却全用李詩二句足成其意特非其倫哉  
况後二句亦  
覺粗直東坡亦安得有唐人之蘊藉耶特一時取巧自成  
一体不害其爲詩也

宋宮觀潮圖

楊維禎

嘗於先輩葉南屏家見元人題宋宮觀潮圖詩皆雄富雅  
健感慨悲壯因假回錄之詩云八月十八日龍死海龜夜  
食羅刹水湏臾海壁成龍門地捲銀龍薄於紙長山移來  
天子宮上前一箭隨西風劫灰欲洗蛇鬼穴婆留朽鐵猶  
爭雄望海樓頭誇好景斷鼉已走金銀島天吳一夜海水  
移馬蹀沙田食沙豈能自撓無歸不歸七歲呱七啼軼道

○練川嚴恭出宋宮觀潮圖索余詩爲首唱且曰得奇語  
始可抗浙江之奇現繼遣金靈沈渴頽飲酣爲之吐錦囊  
句時至正廿年秋八月初楊維禎在玄白亭試奎章龍香  
寶劑書云鳳嘴者玉璫瓏也

又

張仁近

神鯨怒決滄溟水浪沸波騰亘天起巨靈劈山爲開王  
龍捲雪從東來腥風撼地坤輿剖長江萬鼓雷霆吼雄威  
欲吞吳越軍強弩三千皆縮手金堤既成事已非錢塘江  
上開皇畿離闔玉檻照東海貪看秋潮定忝離中原不復  
民易主百萬貔貅宿沙渚倚樓望潮上不來六帝同歸一  
丘土人間廢吳何代無誰能耽樂思恨虞良工不解寫無

造丹青却作觀潮圖

又

張憲

磁州夜走泥馬駒卧牛城中生綠蕪炎精烟上照吳會大  
筭錢唐作汴都玉殿珠樓連翠閣七寶簾櫳渺雲幕生移  
艮岳過江南不數東京舊歡樂茂樹盤上迷綠雲龍飛鳳  
舞峯巒奔玉床下壓大江小海水正入東華門木犀花開  
秋可數鮑七靈鼇振天鼓海開一線截江未雪壁銀城盡  
飛舞吳商楚賈千萬艘黃龍戰船頭尾高豈無海道走中  
王長驅逐北來風濤烟霞蒼上繞城郭屋瓦魚鱗互參錯  
百萬壽民事醉醺坐使中原歷羊駝囚循六帝不復讐西  
風八月凭江樓橫宮人飲白骨恨洪波不洗青衣羞邦基



能報君辱廟子沙頭卓大旗天吳縮頭不敢馳行人指塔  
話楓林三十六宮秋草腓 至正二十一年秋八月既望  
自姑蘇來雲間寓延慶方丈雲谷譚師出宋宮觀潮圖徵  
詩嘗記父老言宋亡時丞相伯顏駐師沙上潮不至者三  
日又記庚午歲正月十四曉有雷自北高峯飛至故宮塔  
頂火不滅者二日撫卷憶舊不覺慨然爲賦七言長詩一  
解適宋仲溫至遂命書之

又

楊基

君不見十五湖上月十八江上潮君王連日醉伐鼓更吹  
簫七声忽如天上落大内臨江起飛閣綉戶朱楹十二闌

嬪嬙歲已觀潮樂潮水信可定日夕來朝宗人心獨不如  
而不思兩宮已未雪耻屢下班師青白馬素車神何不  
令天吳豫食大奸醜奸醜不可食國耻不可滌嗟爾江上  
潮雖雄亦何益潮無益於人看潮徒損神橫江鐵騎未三  
日飛塵煥曆數固有歸爾潮胡不仁致令鸞鳳雖戚已悲  
殘光活無主花落隨暮雨回首幾秋風旌旗又如許又  
如許君忽悲古來在德不在險一杯之潮安足奇右四詩  
無六言下可謂勸敵四集或有或無聞其卷今亦亡之矣  
又安能永傳其許哉感慨之間錄入七脩維禎字康夫號  
鍊厓張憲號玉筍辭體會猶人仲溫名克長洲人鳳翔同  
知楊基字孟載號眉庵吳人仁近疑爲崆峒生也

四言咏物

四言古詩與咏物之體其義相似詩家第一難者古詩模  
擬太深未免顯露風雅多涉理趣又似銘贊如咏物太著  
題則枯皮帶骨而卑陋稍出格則捕風捉影而空疎較之  
歌行相去遠矣

錢氏二女詩

錢鉉河南鄧州色目人也革除間參政因忤

成祖被誅二女金兒玉兒發教坊司女誓不受辱而色長

陳儀特護持之

仁宗即位命官至教坊查審放出皆

令適人因而各上詩一律謝恩長詩曰教坊脂粉洗鉛華  
一片堅心對落花旧曲听來猶有恨故園歸去已無家雲

髮半綰臨粧鏡兩淚空流溫絳沙今日相逢白司馬樽  
前重与訴琵琶其妹詩曰骨肉傷殘旧業荒一身何忍去  
婦婦涕垂玉筋辭官舍步蹴金蓮入教坊覽鏡自憐傾國  
色白人羞孝倚門粧春未雨露寬如海嫁得陶郎勝阮郎  
或云少女原許阮主事後朝命配陶公故云

吊顏詩

沛縣知縣顏伯璫廬陵人也 太宗靖難師過沛顏死節  
焉太師楊士奇過沛悼詩曰平生金石見臨危就義從容  
予亦隨于戰山河遺縣在一門忠孝哭官知故鄉住近文  
丞相主德傳從魯太師欲醉荒坟何處是離上芳草淚空  
垂 李士劉球和云父子捐生總蹈危精魂常与日光隨縣

南荒壠遺民識地下丹心故老知雙節名家先世德四忠  
同郡後賢師古今載筆皆公道共使清名百代垂予另有  
萃忠錄一帙錄類之事備焉今見二詩併記於豪

### 馬踐犬

芥隱筆記歐陽與同院李士出遊遇馬踐犬死於道公試  
書其事同院曰有犬卧於通衢逸馬蹄而殺之公曰使子  
修史萬卷未已也莫若逸馬殺犬於道捫虱詩話又載此  
事爲穆修云馬逸有黃犬遇蹄而斃張景云有犬死奔馬  
之下沈存中云奔馬踐死一犬以爲渾成過穆張也予以  
二書所紀必一事也乃因前人之議而後人復擬以較勝  
耳文意固似歐陽者然據其時則穆在先矣芥隱之言恐

亦簾視壁聽者耶亦未爲古五十年前予同編修金美之  
知縣顧潤夫員外王蔭伯共論此事予戲曰馬逸踐大死  
可矣何數賢之議如是哉金戲予曰可借當時無汝予徐  
曰歐穆何可當也但以一言論之耳顧曰然今偶見二書  
不同思三兄俱卒識之

碧沚詩

吾友豐考功芳納涼碧沚詩曰鑑湖洲上晚涼歸散髮披  
襟送落暉鳴雨乍收微雨續黑雲輕載白雲飛水風度篠  
簾流座山月穿松故拂衣倏忽陰晴堪一笑年來世事已  
忘機此詩流麗暢逸而第七句閑瑣處即景生情煞接深  
契雲卿家法好事者以爲雨時可有日耶此於無過中尋

過矣予嘗以杜詩飛花細逐楊花落黃鳥時兼白鳥飛亦  
可以議論也蓋飛花落於二月柳絮落於四月鷺鷥高飛  
鷓鴣掠水黃鸝則穿林度木而已安得有同飛之理耶此  
特幸目前一時之事不可拘於常理

鴈燕四律

謝宗可有白鴈詩而顧文昱亦有之袁景文有白燕詩而  
瞿宗吉亦有之贈炙人口惟謝袁之作也予嘗併得而讀  
之忘亦無相上下咏物極致真可謂一律也今人止知謝  
袁故并錄以供具眼謝曰翹老西風絕點瑕秋江難認宿  
蘆花雲邊字缺銀鈎斷月下箏聞玉柱斜影亂飛鷗回遠  
浦陣迷宿鷺落平沙声上喚起蘇郎恨為帶胡霜染髮華

顧曰万里西風吹羽儀獨傳霜翰向南飛蘆花映月迷清  
影江水涵秋點素輝錦瑟夜調冰作柱玉闌曉度雪沾衣  
天涯兄弟離群久皓首江湖猶未歸袁曰故園飄零事已  
非舊時王謝見應稀月明漢水初無影雪滿梁園尚未歸  
柳絮盈簷香入夢梨花深院冷侵衣趙家姊妹應相忌莫  
向朝陽殿裏飛瞿曰脫却烏衣絕點瑕銀屏珠箔旧生涯  
玉京老去杭初改王謝歸來鬢已華避雨有時粘柳絮夢  
雲何處認梨花飛瓊不向瑤臺去却入尋常百姓家四公  
顧字光遜姑蘇人終郎中袁雲間人終侍御瞿名佑錢塘  
人終教授皆国初名儒惟謝元入



嘗聞何仲默入場時最少其兄輩以進之御史見而口  
語一對曰弟騎倪馬遂應曰子證父攘羊又閤老袁元  
峰十歲時縣審里役於清道觀隨父至觀不畏而立於  
人前知縣見其如成人喚問何家兒也其文忙應之知  
縣曰曾習對乎曰方孝之時有双鶴飛鳴知縣遂曰三  
清殿上飛双鶴袁應聲曰五色雲中駕六龍縣主驚喜  
与果而退少間李諭擲酒來飲縣道其事而諭曰恐正  
讀此詩而即換其車字也衆曰亦難<sub>匕</sub>因復召見語  
之曰授子四方開六面袁即曰丈夫一德貫三才衆遂  
驚訝此真可謂神童也

恰字

恰字有三義適然見用心也又鶯聲杜詩皆具之如野  
航恰受兩三人當訓適然恰有三百青銅錢用心之義  
也自在嬌鶯恰也啼則聲矣猗窅窅不察此意反引廣  
韻云恰也用心啼非止聲也豈非不知字義而誤以一  
偏言之耶

唐宋用字之別

陸提李峯之有句云岩邊桂樹團丹霧石上苔花閣綠  
雲王蔭伯為更團為生閑為動陸聞而喜之夫律詩妙  
在活字煥生之於團動之於閑可以悟唐宋之別矣

破題

嘗聞或因俚語或因事物滑稽者以之為題而作破雖

無驚人之才亦得游戲三昧錄共間談不猶愈於謾言者乎庾人云仰是覩於天文傳難察於地理月子灣七照幾州幾人歡樂幾人愁運於天者未嘗有遠近之殊感於人者不能無悲喜之異看七月上蒲萄架那人因甚不來也最苦一双鳳鞋間在繡幃下破云時至人而不至君子疑其人之有所拘物偶而人不偶君子傷其物之無所用樓屋破云占天之有餘補地之不足父子東廁父子座席破云事之至急也不擇地而施居欲其安也必嚴分以處三月大雪未幾雷鳴又雹破陰極而凝寒欲驅其寒必有物以麗諸天陽極而生怒欲殺其怒必有物以投諸地

俗語本詩句

今世所道俗語多詩也如十指有長短痛惜皆相似曹  
植詩何人更向死前休韓退之詩林下何曾見一人靈  
徹詩長安有貧者為端不宜多羅隱詩以色事他人能  
得幾時好白李詩世亂奴欺主年衰鬼弄人海枯終見  
底人死不知心奉世盡從愁裏過誰人肯向死前休仔  
細思量底模樣皆杜荀鶴詩事向無心得章碣詩但有  
路可上更高人也行龍雲詩忍事敵災星司空圖詩  
一朝權在手看取今來時朱灣詩自己情雖切他人未  
肯忙裴說詩但知行好事不要問前程馮道詩圖上似  
磨馬東坡詩真箇有天沒日頭宋神童詩在家貧亦好

戎昱詩睡到人間飯熟時本朝錢宰詩月終齋蒲誰  
開素日暮一炷麝炭火樂天詩田婦有嘉猷潑撒新歲  
餘韋蘇州詩前稿已括出全篇者六人今欲省刻止揭其名

風水

易曰俯察乎地理詩曰相其陰陽書曰乃卜瀕水東  
瀦水西惟洛食是古人必明其陰陽而又欲協乎天  
也至晉陶郭出而方有地理之說鳴其葬地及後紛  
紜立論斯又下矣士衡有曰是氣先天地而常存後  
天地而固有氣盛而化氣衰而朽藏以承之于焉悠  
久則亦論其理而欲安其休魄也景純即雜於相術  
故於葬事則曰本骸得氣遺体受蔭葬者逆氣入骨

以應其所主考之士衡之後四世拜公景純惟害主  
敦禍不旋踵是蓋據其理者獲其報主其術者致其  
害蓋觀秦漢以前聖哲帝王層見疊出晉唐以來著  
書擇地術亦精矣富貴之父子孫之多何嘗過於三  
代哉天蓋生人不由人力若吾大聖張真人未聞其  
先之葬也何如歷世又孰有過者哉或曰如子所云  
地無吉凶親委溝壑諸先漫言而朱蔡亦不足輕重  
矣予應曰地必擇吉葬必盡善豈可一切委之於無  
用而不問耶但當擇其寬厚聚氣之所無水泉蟻蟻  
之屬即為吉矣葬已善矣祖宗神靈必亦安矣彼安  
而已亦安也又何必深求衆合克應以求其富貴利

達哉故朱子曰子孫藏相考遺休必致其謹重誠敬之心以為安固久遠之計程子曰地之美則其神灵安子孫盛也余嘗譬人之坐卧也得其所則心安魄靜可以長久可以歡樂可以生育也善乎歐陽玄曰作室先主乎寢所相墓先安乎親灵是惟欲其安而已今乃委之術士只求其富貴利益於子孫豈孝子慈孫之意耶且人家之子世多不才父母親教之而尚不能從况欲枯骨以蔭之耶苟但求其美地雖未必盡合於諸法惟取山水之相因氣脉之凝聚所謂精光時露於一分者然而登山之際形迹指陳亦未可得也况欲從其野師俗巫遷就繆言以成何局以

圖未來利益何其愚耶且欲報其愛親之情以竊山川之靈秀以致子孫之富貴已逆其理矣逆其理而受其害者十常八九自然之理耳何以言之世之術士得陶書者為陶得郭書者崇郭得楊曾之書与各書者紛七籍七真偽純駁世乏聖賢卒難以辯是以淫巫瞽叟遍滿天下蒙昧愈達之際托之以貽禍害往七見之蓋以不惟其理惟其術七七而又不能精也謝子期嘗曰世間萬事欲順惟風水金丹要逆蓋以生氣周適乎大地浸於一身善攝生者識生氣之根凝於一身善葬地者識生氣之止欲聚之於一穴竊取生化之機豈易行哉一錯其旨其何不致



於感壽致禍也然而各鄉士夫專信其術迷而不返貪心使之可慨也夫

又

劉文安公曰地惟由於術則通其術者得吉憎其術者得凶是地何足為右祇而能毋萬妄耶天惟聽於地之所役則葬吉者不復因其惡而降殃葬凶者不復因其善而降祥是天何足為上帝而能父群倫耶余嘗又曰惟天之理可括乎地土之利不可逆諸天故諺有曰未看山頭土先觀屋下人天生善人必得吉地人壞而求諸地理所無也故諺亦曰主者福壽良師輻輳主者當衰盲師投懷何莫而非天也以近

驗之吾杭邵氏之家舊矣至公明而有声塲屋徒有名而未第生二子俱登進士公明曰使吾家葬地善耶不當鬲余而發其子使不善耶吾嘗安飽今子孫繩乚又多富貴豈非天生二子因有以得其地利耶苟以術者言之必以邵氏之墓善矣是公明之言反為繆戾者必有所歸也又嘗驗之吾家葬地俱常伍害伯叔五人俱富於財因以墓不佳而尋師求地遂無虛日先君曰汝輩皆有子而我獨無汝輩皆宜擇而吾當守其先美余妻而与已焉繼而吾母老而余亦知地之不佳也意其二百餘年之墓三代不可遷矣因吾母而遷二親寧不動其遺骸而求富貴吾心

安耶因亦卒葬焉然而葬前母時先君無子葬吾母  
時余亦無子後考生余余又三子矣百五十年間伯  
叔之墓木雖已抱矣皆乏子嗣豈非信淫巫瞽叟之  
過歟究而言之又豈非由於人而成於天歟至於陰  
德之說亦術士之所不棄故卜氏有曰吉地乃神之  
所司善人必天之所相又曰必欲求滕公之佳城須  
積款款之陰德此又意外之論亦歸之天而已

七脩續彙事物類

杭仁和郎瑛仁寶著述

滇南曲靖張樹聲校刊

舞馬

世惟知唐玄宗之有舞馬而不知前已有之非常馬也山海經述海外大樂之野夏后啓于此舞九代馬宋大明五年河南國進赤龍駒能拜伏善舞唐中宗景龍間文館記有舞馬又異物誌云大宛有解人語知音律者覩此自有一種其來久矣廣川廐政以馬異於今也或角或距朱尾白鬣親見其圖矣胡未能述其真予讀唐史明皇教舞馬百駟爲左右部因謂之某家驕衣以文繡絡以金鈴雜以

珠玉舞曲謂之傾杯樂昇平樂凡十數曲用樂工姿秀者  
數十人衣淡黃衫文王帶立於馬之前後左右施板床三  
層或令壯士牽一榻樂作而馬舞床榻如飛俯仰騰躍皆  
合節奏故張說詩曰試听紫駟歌樂府如何騏驎舞華陽  
杜詩云闕鷄鷩舞馬使登床徐積詩曰繡榻盡容騏驎  
足錦衣渾蓋渥泥皆其證也

樂天雜錄謂舞馬者乃人每  
然床上非也

### 噴嚏

詩曰願言則嚏註云汝心思我則嚏也今人嚏而云有人  
說已豈無謂哉故漢有嚏耳鳴雜占十六卷東坡有曉來  
噴嚏爲何人之詩未亦遠矣昨見柳氏舊聞一嚏事雖非  
正義贅之亦可發笑也唐玄宗友爱諸昆弟一日同寧王

食王挫喉噴食上髭王驚慚不安玄宗亦不懌黃惟  
縛在側曰不是挫喉乃噴帝耳帝遂悅因戲曰懽懽倭臣  
乎黃又曰臣知上思臣匕乃願言則嚏耳帝又大悅

### 魚袋金花帖子

魚袋始於唐高祖取李淳風鯉魚得衆之識又襲古義魚  
符之事故製爲魚袋以藏符契也懸之於帶有金銀緋紫  
四種論官職也開元以後勅非戰功不給歷代因之宋仍  
以品級定四種云金花帖子報進士之名亦始於唐至文  
宗時革之宋則復用也似在南宋不用見中興紀然考  
聞先祖系其制用黃昏塗金大書姓名於上下有兩知奉官花押仍  
用白紙爲套貯之亦題姓名於上登第者隨附家書於中

云

### 痘瘡

痘瘡見在胎時受母氏熱毒穢氣而成。遇陽長之時發也。故醫書載人身有三穢液毒之說焉。又曰痘因熱毒而生。古今以見生時即空出口中穢血未食時與飲黃連汁使胎糞同下。此治痘之源。最爲有理。蓋見在胎而食穢啼聲出而熱血下矣。龐氏以爲天行痘瘡漢魏以前經方不載。建武征虜而染未呼爲虜瘡。此成胡說也。夫人生出痘自爲常理。壯夫征虜染於小兒。據可信乎。旣曰天行又曰虜瘡。下亦自相悖乎。虜人不生痘瘡以其不食五味也。東漢方書不載。正見古人飲食淡薄。非若後世膏腴厚味也。考

之枌蒜由西漢通東夷始有美酒佳者至唐方盛發於唐以後彰七矣且痘於富貴者多重貧賤者常輕尤可見其母氏所食而然耶至有不出如吾母重出如吾友陳敬亭之子則又原受毒氣至有輕重不爲常也已

### 婦女殺賊

正德間流賊劉六等標掠山東一日過東平州而州中姑嫂三人避之方間一賊遺後見其姿色美而驅入林莽污其大姑与嫂矣將污幼妹七俟其上身隨手交按賊頸號叫之嫂遂踞坐賊背大姑抽賊刀斫其腦以死報官準賞格嘉靖壬寅北虜入山西汶水兩賊至一村有姑嫂二人急避而姑下枯井嫂爲賊擒以問適尙書一女何在對以



井中賊以有物隨下矣一在上而一下以筐扯女起視之  
無物叱立井傍欲污也方復起賊姑嫂見其用力因勢共  
推賊落而下其土石焉二賊俱死於井藩之四方予聞二  
事而感揚鍊厓薛花娘之樂府非誣矣第人患無心耳東  
平之事虧其小姑成其大功汶水之賊雖得其機實多其  
勇也

### 鹽

天地之元氣寓之於水故水能載乎地也然水体輕清者  
則上浮而重淡濁者則浚下而鹹故曰海鹹河淡鹽井有  
深至五六十丈者陵州者也乃東南卑下煮海爲鹽易成而  
最廣所謂斥鹵潤下水泉鹹淖積而成鹽耳若山西忻州

平原鹽望皆若霜然土人刮而熬之為鹽由地近潯沱亦  
卑下也沙漠有鹽澤河東有鹽池者又非是欤常晒陳水  
南云大谷榆次地高產鹽又且尋丈之間後能種藝尤盛  
此不可以常理論殊不思生氣既厚以水脈不泄而為井則  
峻發於上種流亦茂矣第鹽池凡物下皆而成鹽真理不  
可曉也惜未經其地日審其事以尋經其理欤

### 從葬沙板

以人殉葬見於黃鳥之詩秦繆公事也及讀史記秦本紀  
武公葬雍之平陽以人從死者六十六人又曰至獻公元  
年方止則知武公而下十有八君皆言殉焉其來遠矣惟  
黃鳥彰也者為惜三良且殉者百七十七之多故也後世

帝王意亦有之或宮人一二少而無聞焉棺用沙枋意起於宋後蓋聞古塚之發無沙棺而惟誌石五金之類及讀程明道文集記葬曾祖累歲求其不朽之木後因咸陽人發東漢時墓棺棺尚在又某寺完地而得古棺累以栢木其地脩城得古栢堅潤如新且思栢木之理詳察地中之事因用之以葬七柩據此則南宋以前無也惜未有以栢木与沙枋同埋數十年以試

### 古鏡

世之古鏡多出北方古墓人知而寶之未知墓出故也按漢書霍光傳光之喪賜東園溫明服虔註以東園出鏡之所予恐溫明鏡名也又按癸辛雜識云世大歛後用鏡懸

棺蓋以照屍取光明破暗之義據此二書則知鏡在於墓其來已遠而取義亦明白也意其開一墓而得鏡不一似古人送葬者皆贈之如今人之綿箱耳

樹重

旧說桐梓之重樹下播鼓其重自墜予意鼓音寬脾其聲氣既振於下則物之小者因聲氣而解体隨之以墮理也癸辛桑識以杻樹枝柯生黑小重用多年水燈繫掛於中終七然墜下矣此不知何說也

華亭兩縣丞

嘉興儒學陸汝霖 湖學贍而精於時文聲聞籍甚門生多仕負志拔貢去仍入監應選扶病敘誡當道憐其才卷雖

不終而特選華亭丞以地美且近也奈何到任廿日卒湖州顧其蓄編脩前妻之弟步輦至京相見續取之姐乃吳冢宰女也女以姻家俱宦此獨可布衣乎告夫懇父必欲與之官時開輸粟之例僭者竟得入選二家因爲納銀竟選華亭丞在任數年而富貴踰常也嗚呼以明經俊義辛勤一世而不能享一日之尊榮以布衣白丁籍人財勢而一旦有終身之富貴人生豈非命耶

捐書扇

捐扇由成化初高麗貢至 朝命效製以答復書格言以賜羣臣民效而爲之故水東日記云起自本 朝人隨道焉不知北宋已有之矣故東坡云高麗白松扇展之廣

尺餘合之只兩指正謂是也又見於猗窠蒲葵扇條曲豈坊亦曰家有趙考所盃摺扇陸儼山亦有楊妹子所書絹摺扇似皆以絹爲之故古有紈扇羽扇而無帟扇之說是也黑骨泥金却起於日本而中國飾之以金耳

## 二窰

哥窰子龍泉窰皆出處州龍泉縣南宋時有章生一生二弟兄各主一窰生一所陶者為哥窰以兄故也生二所陶為龍泉以地名也其色皆青濃淡不一其足皆鑲色亦濃淡不一舊聞紫足今少見焉惟土脉細薄油水純粹者最貴哥窰則多斷文號曰百圾破龍泉窰至今溫處人稱為章窰閩國初先正章溢乃其裔云

楊曹仙佛

吾師楊長史之父冲杭庠士也篤好仙術一日遇麻衣人於途曰有客寄書於宅君知之耶歸果得書開緘則唐仙人張平叔一拜帖也意乃仙降求之愈切人以痴呼之逾年復又遇之拜懇欲隨麻衣曰子緣淺難成功名亦不大科甲在後人也記之勿泄忽然失之後仕贛之教諭麻衣又至家人因詢之楊語其所以不久捐館甥孫曹岳斷乳食素信心於佛一夕夢僧持杖如地藏者使之捧杖環即時升起過屋岳惧而驚醒焉後復夢見之今年二十三矣仲冬復夢此僧曰在橫河橋待明發不語家人至尋其處果無一老僧坐堦岳拜之欲隨僧曰我長往湖湘矣汝可

隨乎岳懇求去遂同登夜航明日至飯肆僧澡面見其十  
指甲拳縮寸許入水伸長尺五六人共駭然食飯數口而  
止食納飯金於主僧曰可擲之岳惜未應猶同至蘇州僧  
又曰擲金乎岳又不應且思家淚下僧曰汝緣淺<sup>七</sup>指  
側舟曰可倩以婦時順風一日夜至杭矣試觀二者知仙  
佛果有也惟誠心求之未必不驗而成否乃其教欤

### 三高人

永樂初溧陽徐尚書為潛匿建文 朝廷抄戮一門有幼  
女散入吳籍色長陳儀陰眷之不使污辱後遇赦儀為嫁  
之尚童也聞錢鉉能詩二女亦儀成全以從良天順中泰  
州馬士權寒士也素與學士徐有貞交徐為石亨輩誣奏



云馬所知也馬受極刑而無一言以及徐亡感之許一女  
為婦事已負其婚馬終無怨忿之言又昌平侯楊俊亦為  
石亨誅誅有娼婦高二臨誅生祭楊而收屍嗚呼在士權  
實人之所難能而娼夫樂婦又能為人之所難為真罕矣  
田不知高之名也見前今見載之客座新聞併陳馬事後  
錄於蒙

燕

燕水鳥也故名玄鳥簡狄於水次吞其卵而生契淮南子  
曰燕入水為蛤爾雅翼曰求雨者投之竭泉即渡人食燕  
肉不可渡河明其水也其未去皆避社日不以戊巳日取  
土為巢書戊巳於巢則去皆因其土克水故也埤雅載其

事而不能明熱顧況詩云燕七于巢綴緝維戊抑錯矣  
樂天爲之序又云不以甲乙啣泥此可謂既失之鴛又  
失之螭矣

蚊

白鳥有二曰蚊見夏小正丹鳥羞白鳥註蚊也又白鷺  
見杜詩黃鳥時燕白鳥飛之註東坡詩不怕飛蚊如  
立豹七亦蚊也見齊東野語引吳興志有豹七蚊  
子亦見大戴禮

浮炭

陸放翁筆記云陳無已貧見其手札每問酒務官托買  
浮炭七者投之水中而浮之故今人曰焚炭七訛也覲

此訛之已久但事小人不之辨耳

不灰木空青蘇合香丸

予有刀柄乃不灰木然不能點燈後見格古要論云用石脂油蘸之點燈方知如空青必貯之古銅器中月以水濕之不枯死也蘇合丸藏用荷葉包裹然後不乾相同

八駿

周穆八駿之名舊矣唐太宗八駿有圖并事子俱載前事物類

威烈八駿曾聞劉杲齋有味今得名歲抄

曰龍駒曰赤兔曰烏兔曰飛兔曰兼黃曰銀鬃曰棗騮曰黃馬現其名既殊於前之一種無事實而又皆中箭

被傷恐亦後人因數皆八而文以傳之歟

### 眼鏡

少嘗聞貴人有眼鏡老年觀書小字看大出西海中虜人  
得而製之以遺中國為世宝也予意恐即文選中所謂王  
珣海月及讀臨海異物誌載海月如鏡白色正圓有腹無  
口目可炙食又緯畧引郭璞江賦晉安海物異名記猴鯖  
等錄明王珣處俱不言製鏡之事後与霍都司子麒言霍  
送予一枚質如白瑤璃大可如錢紅骨鑲成二片若圓燈  
剪然可開合而折疊問其所来則曰旧任甘肅夷人貢至  
而得者予喜甚置之眉間未若人言也每疑而問人豐南  
禺曰乃活大車渠之珠囊製之者常養之懷中勿令乾死

然後可照字予意西番所未是矣然西番少車渠人養亦未必然得已廿年室之無用不猶鼠之藏金乎書出而傳之博識者必有以告我

古今人形不同

古人豐偉長大者書載之矣如三國姜維死時剖膽如斗大宋張世傑死海獲屍焚時見膽如斗大則其人如何其長大又未見載之書是知古人較今自長大昨四都鄉人掘地得髑髏如斗大者人皆駭之此必宋元人矣故聞利州有則天像長七尺成都有孟蜀后妃祠堂皆極修偉福州大支提山有吳越王紫袍寺僧升倚拳領猶拂地則知古今人形不同

王錢門對

舊聞弘治間吏書三原王公恕署門曰任於朝者以饋  
及門為耻任於外者以包苴入驛羞嘉靖間藩司參議  
楊州錢公嶸刊門署使所屬衙門寺觀帖焉對云寬一  
分則民受一分見祐鬼神要一文不值一文難欺吏卒  
予聞而喟然此即王尚書聯也二公非心事光明胡能  
門聯如此哉故王近世家宰難及而錢忤當道不久去  
然二對近人不知前乃真西山奏跡後亦古語也惜忘之

大蜘蛛

幼讀酉陽雜俎載蜘蛛大如車輪者以怪不足信及聞  
都少鄉南濠云弘治間登州山中有蜘蛛身龍鬚而龍

爲蛛系所困後有火龍來焚其系蛛不能爲遂爲龍取  
蛛去蛛死黑水流山下身徑一丈六尺予復將信而將  
疑也又讀双槐歲抄云成化七年蘇州盤山有蜘蛛与  
龍鬪死事友人吳西江亦云家客上江丞某人家住山間  
一夜爲龙來取蜘蛛之珠山木尽折水湧數里卒家遭  
害然後知六合之內異物異事未可以不見爲怪也

香臺百咏

香臺詩集吾杭國初瞿宗吉所作擬玉臺香奩而各取  
一字以名之曰初曰續曰新皆百咏焉公自序其旬日  
而成者予得公之手彙每讀每嘆其李博才敏近時少  
其人也昨讀蟬精雋又知先輩徐百齡爲之註張天錫

爲之序惜無刊本未知其子孫有藏槁否又甚惜焉或曰  
傳与敏可也然其題咏不出閨房賞玩不過風月殆非雅  
人雅士之爲殊不思古人有云咀灵芝而嚙甘露情動乎  
中拔鯨牙而挹天漿夢遊於外自可予知者道此布帛菽  
粟固人間至寶而海錯蔬菜亦可少者哉辰轉於懷筆之  
於槁

### 戴進傳

永樂末錢塘登士戴進從父景祥徵至京師筆雖不凡有  
父而名未顯也繼而還鄉攻其業遂名海宇鎮守福太監  
進益四幅并薦先生於 宣廟 戴尚未引見也 宣廟  
召益院天台謝廷循評其益初展春夏謝曰非臣可及至



秋景謝遂忘心起而不言上顧對曰屈原遇昏主而投江  
今屈原對漢父似有不遜之意上未應復展冬景謝又  
曰七賢過閔亂世事也上勃然曰福可斬是夕戴与其  
徒夏芷飲于慶壽寺僧房夏遂醉其僧竊其度牒削師之  
髮寅夜以逃歸隱于杭之諸寺為作道佛諸像故今花藏  
潮鳴尚多手迹吾友張濟川家亦有天王斗聖數十幅繼  
而庭循使人物色戴聞雲南黔國好益因往避之值歲暮  
持門神至其府值之其時石銳為沐公所重石見其益曰  
此非凡工可為也詢戴同郡人遂館穀之然終不使之越  
之人數年謝死而少師楊公士奇太宰王公翱皆喜戴益  
益則老矣先生循七愉七人樂与友凡親友不給者每作

數紙與之人爭價焉其點染顏色妙奪造化鋪叙遠近  
深雅淡人物山水較前人另出一格其于諸家無不能  
楊二公常稱其盛當與古人相頡頏卒時七十五天順六  
年秋也字文進以字行號靜菴文號玉泉道人先生沒後  
顯以盛名世者無慮數十若李在周臣之山水林良呂  
紀之翎毛杜堇吳偉之人物上官伯之神像夏少卿之竹  
石高南山之花木各得其一支之妙如先生之蕙美衆善  
又何人欽誠吾中之聖今得其片帑者如拱壁焉去後又  
何如哉嗚呼公藝精而不售屢轉為競藝者所忌卒死窮  
途豈非其數哉然而後世名及者其可與並又豈非道理  
之不可誣哉賀御賢誌墓避時而不詳止云為藝所忌予

過橫春橋見其墓淒迷於蒼莽之中祀絕而將為人發矣  
悲其事因掇其所以書其傳云草橋子曰退之有云其本  
固者其末茂其膏沐者其光輝戴晉奔走南北動由萬里  
潛形提筆經幾春秋無利祿以繫之也生死醉夢於繪事  
故李精而筆著也而名遠似可與天地相終始矣究其  
當時不過一盈工而已嗚呼世之赫也目前以富貴驕人  
者多矣而不知所自計此字不愧諸

七修類稿奇蹟類

杭仁和郎瑛仁寶著述

杭  
校刊

佛睛黑石

廣西全州無量壽佛寺中佛即無量直身也其目睛指甲與生人無異目視物而能轉甲年久而亦長湖廣永州浯溪之厓有黑石焉較他石爲少細視之暗然以溪水滌之則浯溪之景全現於中若鏡照然好事者昇輦於家水洗經日與頑鴉者等也後昇之舊處光則又如舊矣蓋滷雜以他水但要記其舊痕以飯甌蓋之於中掠去面上之水至旧痕處則取去者皆他水而滷盡在也或以甌簞隔之

亦可以他物則確分矣此皆理之不可推者

碑樓

徐武寧王之墓在鐘山 皇陵之右神道碑乃我  
太祖之筆也碑因高大爲樓以居石磴以上登者即時必  
病人莫敢爲予嘗聞之昨友李見石之子登之果然豈非  
太祖在天之靈不容人之在上耶

水石變異

春秋不言於晉歷代少見也弘治間陝西慶陽府天雨石  
子大如鵝卵小如鷄頭皆作人言春秋水閫於穀洛亦以  
罕矣正德間直隸文安縣水忽然僵立高可五丈大亦如  
之鐵實

老人

錢希白洞微志載鷄窠老人如小兒事嘗以爲怪未信昨  
聞會稽李通判云嘉靖甲午在室慶時有事於所屬新  
寧縣未至縣五十里宿於山中民家堂前架一皮置木匣  
其上中有老人長可尺餘立則露首声唧唧如燕子語問  
之乃其家遠祖也年已有八十矣能言元朝事日不食或  
進一盂水而已季蓋質實不妄語者據此與鷄窠老人不  
食不語相符而實有矣夫人老而體縮由氣血衰也氣血  
衰而声音低理也但骨胡能短食胡不進而長生似與天  
年百二之說戾矣及天地間自有一種間氣所生者如輟  
耕錄所載人腊是也如筆談所載呂縉叔終時如小兒病也

血水

嘉靖甲寅三月寧波慈谿縣灌浦鄭家忽然地烈流血奉家驚惶至暮町畦間俱是也當道奉奏明年四月倭賊陷其縣縉紳軍民死者無筭焉又明年六月賊至杭州北門外大肆焚掠五日方去亦有死於鋒下者甲寅之秋其地新河填河水亦尽赤豈非皆血水之所兆耶

異妖

舊聞宦客云某地某都司家晨起見廳壁上有王者一人車騎數件男女侍衛者又數十人見之動躍頃下坐列於廳奔走應答真人物也主人驚出且疑且告曰尊官何來何顧於余王曰吾非祟也暫過借宿不擾不侵無喧無恐

吾當有益於汝也一時婦女進於內僕從咸鑒於厨或易  
於市或服役於庭除車馬行李各置其所逐主一家於空  
室葉米家具與之共矣往來冠蓋皆不識之人踰半月謂  
主人曰某人橫負汝財吾爲汝追之批帖令人召曰三日  
內不來償主當焚某處房屋其人恐疑問某地之屋焚矣  
辦值急付其主明日別主人冉匕自空而去余以宦客欺  
已耳嘉靖三十七年三月寧波象山縣梁家忽至一老嫗  
四媳二女曰云借宿其家俱不見獨一幼婦見而迎之啓  
以尊客素昧居宅何處嫗曰女翁出外乏主物特來相倚  
世爲宅戚也婦走白翁姑匕匕疑爲祟急辦牲醴以賽之  
嫗怒曰吾非爲禍之祟何爲生食我今婦熟而進之飲饌



言笑起卧如生人婦女皆國色嫗雖老而容儀亦脩潔也半月始去以此證彼信可有也然鬼無形與声倏忽变化則有之雖五行之妖亦不如是至於始皇之時素車白馬持壁與客之異王莽時池陽小人無數或乘馬或步持物劉歆以爲人變皆屬皇之不極今又非其時也豈幽怪錄所謂世間人鬼棄半之說耶

李伯時天馬圖

宋元祐間外國進至三馬李伯時愛而圖之卷成而馬俱死矣聞出空青集而予未之信也昨觀雲煙過眼周公謹細為紀之其馬之名色形數未歷日月又引曾跋以證之跋曰元祐庚午余未京師見魯直九丈於醴池寺魯直謂

余曰異哉伯時貌天廐滿川花放筆而馬殂盖神駿精魄  
皆為伯時筆端取去實古今異事當作數語記之後十四年  
當崇寧癸未余以黨人貶零陵魯直亦除籍徙直州過余  
瀟湘江上与徐靖國宋彥明道伯時昼殺滿川花事指余  
親見也余請九丈當感前言記之魯直笑曰只少此一件  
罪過後二年魯直死貶所又二十七年余領浙漕當紹興  
辛亥至嘉禾与梁仲謨吳德素汎舟訪刘延仲於真如寺  
刘出是圖開卷宛然曠昔俯念四十年憂患余生獨存殆  
若異身也因詳序本末使後來者知伯時一畧異事亦魯  
直遺意耳據此則實有是事真可為異又嘗聞傳神之人  
云凡寫病者之照肖之則病人多死豈非亦收其精魄於

繪事耶況李術至精則通神矣故世傳尤眠常昼一龍正  
夙雨而點睛遂為飛去夫雲烟過目無刻本而抄者多訛  
且少也予因略正數字錄之於稿或傳之於人庶幾不沒  
李黃曾三公之意也曾名紆字公卷空青其号官至中大  
夫

### 透光鏡

周公詭記辭千伯棧有透光鏡一面映日則背花俱見九  
突處其影皆空余嘗賦詩也又謂郝清夫亦有二面一止  
透半一透之不甚分明紀於雲煙過眼予意此必鑄時或  
異而用銅用藥非常者殆如唐時揚州所進水心鏡乃神  
龍之化耳據是則周穆之火弁能照暗室如晝始皇之方

鏡能照人五藏

雙龍藏抄云此化甲辰宿州墾田得鏡照見農家男女墓中人物農夫驚異而碎之亦用也

尚書夢

予一夕夢尚書王華盛公來

顧時

訪中翰葉柳亭葉得款

間出冊示之乃盛昭別詩也予因告其昨夢今見之非  
數焉翻拍又見尚書梅林胡公之跋語葉曰此尤有大  
數之說廿年前三茅道士夢胡立祠之地有豐碑大書  
尚書位三字是胡科卒之年天已定其平夷之功建祠  
之事矣彼又相駭然嗚呼梅林功業之大恩德在杭  
數當見於道士之夢也而盛之詩葉之款項一事亦  
見於區上之夢豈非諺謂飲啄有一定之數耶貪叨富  
貴者於此可懲言

郭季

郭子儀三十年無總麻服見之史異也吾友季太公亦  
雖非郭之盛家指亦幾千矣三十年家無死者亦異

祈雨

嘉靖癸亥杭因祈雨府差景隆錢道士往富陽縣龍門  
山取龍去縣幾百里山路崎嶇荆棘叢密衣休俱為損  
傷至則本地鄉民亦為雨而潭中已得一蛙供於廟矣  
道士焚牒拜潭亦得四蝦一蛙置瓮以行途間辛苦不  
免與同事者怨以為一蛙而費苦錢糧人役如此至杭  
無雨可煮食之頃刻雷雨作交淋漓遍体咫尺不可辨  
也晚視瓮中二物無一存駭然只得仍到龍潭拜求廟

僧曰勢不可得矣復又懼以官法僧不得已供蛙与之至杭果得雨將送還潭視之瓮中又無矣予舊聞蘓人都少卿言同年陸景福知寧波日取金線于天井山之事亦然意于辯證類中論龍乃神物非若程子所云乃獸人得而玩者非也今益信諸

### 屍行

成祖時都御史耿清犯駕伏誅以屍植草懸于長安門是夜夢清伏劍繞殿遂上明日駕過門忽然繩斷屍行手指若犯駕狀夫夜夢有之而繩斷亦有之屍行手指何物使之哉

### 周費二夢

嘗聞大宗伯周公洪謨鄉貢上京時舟至維揚夜見一人  
謂曰吾即子之前身子去前程遠大公曰子何人而有是  
言對曰吾友鶴山人丁某候然不見似如夢然後公官南  
京以書詢楊守三原王公恕王甚訝之詢郡果得其人乃  
建文時蜀府教授及詢其形像不同江西閣老費公宏中  
鄉試時無錫金廷輝為主考閱卷夜倦恍惚見一卯角生  
揖而告曰人非堯舜安能每事盡善願賜薦拔驚覺似夢  
心異而遂以是卷置案上二三場復夢此生又至如前言  
因遂尋繇取之揭曉賞年正卯角貌又似主考問其夢不  
知也則神其事者誰耶以鬼神特假其靈異何形像之相  
似耶以為好事者為之耶則周公嘗自有詩云生死輪迴

亭者冥前身幻出鶴仙靈當年一覺揚州夢華表歸來又  
姓丁金主考乃少鄉都南濠年家都親與余言者此理竟  
不可格是果三魂七魄之說哉

七修續葉奇詭類終